



## TAPAK 7

### American Idol nung Katy Perry-i tetendanger mapa inyaksü



## TAPAK 9

### Modi-i Germany, Spain aser Russia semdangtsü



Bodbar nü New Delhi nung MP Rajya Sabha, KG Kenye-i meina Nagaland Chief Minister, Dr Shürhozelie Liezietsu-i Union Minister of State(IC) for Tourism & Cultural Ministry, Dr. Mahesh Sharma den ajurutepdang agiba noksa ka angur. Nagaland nung tourist tem anenzükadk peria maliba aser Hornbill Festival kanga nungtu kuma aoba ajanga state nung tourism dak sendakba nung Centre-i yaritepsü atema tanü Chief Minister-i Dr. Mahesh Sharma den tebilemba lemsatep aser idangji Union Minister-i Nagaland ji Hornbill Festival nungdang masü saka kum piyong tourist temi semdangba tesem ka kümdaktsü asungdangba ama yaritepsü nangzük, ta CMO Media Cell sangdong ka nung metetdaksü. (New Delhi, May 17)

## Nagaland nung gari lenmanga ta asütsüsa lenmang mali : NPCC

**Dimapur, May 17 (TYO) :** May 9 nungi 14, 2017 tashi All India Congress Committee nung tezülor aser North East state-tem reprangtsü asoshi shimtetba lenir, Dr. K. Jayakumar den külemi Wokha, Zunheboto, Mokokchung, Longleng aser Mon sema jajaogo aser tamalen ghonda ka agitsüba lenmang nung ghonda asem agia liasü ta Nagaland Pradesh Congress Committee nung tir Wb.K. Therie-i metetdaksü.

Zunheboto aser Mokokchung na tsüingda aser Mon o Tizit na tsüingda lenmangji kecha gari lenmanga ta ajatsüla masü liasü ta paisa ashi.

Kodangsa tesem ka tongdir, item tesem ajak nung parnok agizüka jembirtem ajaki

nümamedangteti "Rasta to enika hie ase" - lenmang ya yamai dang to ta shia liasü ta NPCC tirisa metetdaksü. Nagaland nung 2018 election ya ajak asoshi tayongzükba tulu asütsü. Ibai asenok atema külemi tajungba kuma melenshitsu mapang mesüra külemi tamashi nisungtem ama ochimashiba yimten yimsüsüba kübok samatsüba mapang ka asütsü ta NPCC lenirisa ashi.

Tang government nung alirtemi taoba kum 15 tashi nübortem meyong rongsen auyadenogo aser tang parnok rongnung lemsar yimten tashi rakteper. Item ama ochimashir nisungtem nung jagi sübokrem agitsü aser senotsü auyatsü bilemetsüba daka alaka parnok

dak nungi kecha tajung imlatsü mali ta K. Therie-isa metetdaksü.

Nagaland nung givernment ketdangsertemi Village Council aser VDB purtem dang cheque nung kecha mezülü sign sädaktsür. Iba ama tia nung yimtaklirtemia government-i terenlok mapa inyaksütsü ta asübabo mamanger ta NPCC lenirisa metetdaksü.

Joko nübortemi government-i terenlok mapa inyaksütsü ta mamangba ajanga, nübortemi taitüa maitsüi ajemajema dang election mapang ka atar ta paisa ashi. Tang ya NPF aser BJP na külem ser government bener aor saka parnok rongnunga meputep adokogo ta Congress lenirisa ashi.

## May 23 nü BAC senden amentsü

**Dimapur, May 17 (TYO):** Nagaland Legislative Assembly Speaker aser Business Advisory Committee Chairman, Dr. Imtiwapang Aier-i May 23, 2017 nü Provisional Programme yanglutsü atema senden ka amentsü ayongzükogo.

Sendenji anepdang 11:00 ako

nung Assembly Committee Room nung amentsü aser may 27, 2017 nü Sixteenth (Special) Session indang Provisional Programme yanglutsü.

Iba senden nung BAC züingsem ajak arua adentsü metetdaksür, ta Dr. Imtiwapang-i sangdong ka nung metetdaksü.

## ACAUT Nagaland-i jangjashitsür

**Dimapur, May 17 (TYO):** April 24, 2017 nü osangkakettem nung sangdong ka agütsüba nung nisung karibo NSCN-IM-i saru agiba nung ACAUT Nagaland-ia pusema nungiter ta aibelena angateter saka ACAUT-i saru saruba atema telok shinga pusema menungiter, ta tanü Media Cell sangdong ka nung metetdaksüogo.

NSCN-IM-i employee salary tax 24% nungi 12% ajemtsü telemtetba agiba nung ACAUT Nagaland-ia pusema nungiter ta nisung kari mashileni angatet. Ajisiüka, Naga yimten teloktemi saru saruba nung ACAUT Nagaland-i shinga pusema menungiter aser nübortemi akhangba 'Sorkar Ka Saru Ka' ta tangatetba nung masetshii nokdaka lir, ta Media cell, ACAUT Nagaland nungsa shia lir. NSCN (IM)-i 'Syndicate' aser

'dealership' system agientsü telemtetba agiba ang pelaa agizüker ta taoba sangdong nung ACAUT-i metetdakja liasü, ta parnokisa shisem.

ACAUT-i 'Sorkar Ka Saru Ka' ta asüba nung temelenshitsu kecha masür aser nübortemi aginüba ama matalok tashi, shishilembar/sorkar mapa inyaker mesüra kija shingaia Naga yimten teloktem nem saru magütsütsü tetuyuba agütsür, ta ACAUT Nagaland-isa nenshia metetdaksü.

Sorkar mapa inyaker karidanga telungpur telok nem ozüing alema saru agütsüra, parnok anema ken o benoktsü. Maneni, ACAUT Nagaland-i Naga yimten telok ajak dang 'Sorkar Ka Saru Ka' ataloktsü atema mapa inyaksü mepishia metetdaksür, ta sangdong nungsa ashi.

## College/School indang garitem atema metetdaksür

**Dimapur, May 17 (TYO):** Kaketshirtem anir senzüba College/School tem indang Bus & LMV temi kum aika saru magütsü aruba mesüra kulikaket tejanga melii senzüba putetogo. Anungji, June 8, 2017 matongdang garitem renew/register/reassign asütsü metetdaksür, ta District Transport Officer & Secretary, Regional Transport

Authority Dimapur, Nagaland-i sangdong ka nung ashi.

Tang nungi Educational Institution indang garitem ajak mita reprangtsü aser Motor vehicle rules Act amshidang timtem kar ajurura iba tebilemetsüji onoki mabentsü aser aibelenertem Motor vehicle Act kübok temerenshi alitsü, ta sangdong nungsa metetdaksü.

## Osang prokba ya yimten tashi alir nem mamshidaksütsüla

**Dimapur, May 17 (TYO) :** Osang adoker aser osangbenertem parnokji yimten nung tashi alirtem nem mamshidaksütsüla, kechiyong osang abenbaji shinga jak repranga masü saka kechi ochi aser shitak, ibaji sangdongtsüla ta Morung Express yimozülur Dr. Aküm Longcharii metetdaksü.

Osangtsüsang abenba mapa ya government aser nübortem na tsüingda shinga tsütsüa atsünga masü saka kechi shitak aser ochi, ibaji metetdaksütsü merangtsüla ta Dr. Longchari-isa metetdaksü.

Pai iba o ya tanü Capital

Convention Center, Kohima nung Information and Public Relations (DIPR) department ajanga ayongzükba shisalemsatetba sentong ka nung jembidang metetdaksü. Iba sentong nung tanü tensa osangtsüsang abenba maparen nung tebenja aser tebilemetsütem indang shisalemsatetba liasü.

Paisa ashiba agi, osangbenertem sentong ka nung adenba osang agütsüadang, yangji tongti tesemdang aser tongti o jembirtemi ashibaji dang masü saka nübortem asoshi nungdakba mapatema repranga zülutsüla.

Paisa state nung osangbenertem mapa nung tajungba kümdaktsütsü asoshi inyaksü bilembaji junger aser timtem mapang nung osangbenertem kümzüktsüsa osang adoker aser yimozülurtemi inyaksüla ta metetdaksü.

Osangtsüsang prokba ajanga loktiliba nung temelenshi tulu bener arutsüsa tashi alinungji, osangbenertem temaba jenjang nung alirtem indang dang masü saka tsüinglangen alir nübortem tia indanga tonga oagi osangtsüsang abentsüla ta Longchari-isa metetdaksü.

(Maneni tapak 12 nung...)

## Nagaland nung party tasen ka tenzükogo



**Dimapur, May 17 (TYO)** Nagaland nung general election agitsü ita ishika dang lia, tanü Bodbar nü party tasen ka tenüing agi Democratic Progressive Party (DPP) tenzükogo. Iba senden ya Dimapur nung liasü

Tanü tenzükba yimten telok tasenba DPP nung tirji taoba Lok sabha MP, Chingwang Konyak aser tezülortem rongnung tongtiji Abu Metha asütsü. Tena den tadong tir pongo aser tongti zülur asem shimogo.

Iba telok sangdong ka nung

ashiba agi, iba telok yagi Naga yimten tebilemetsü indang yimjung nung latettsü asoshi jembia aliba maparen nungittsü aser tekaratiba nung telemtetba agitettsüsa yaritsü. Iba nükjidong ataloktsü asoshi nübortem den shisalemsatetba inyaksü aser Naga nung telongjem atema temulung agütsütsü ta parnokisa metetdaksü.

Iba yimten telok tasenbai democratic inyakyim aser nükjidong angateta inyaksü aser ochimashi, tashiyim aser tim

masüba mapatem ajak anemtsü. DPP teloki ochishia inyaksü aser nübortem temeten akümtsüba amshitsü, sensakertem yaritsü aser Naga nung sobaliba tajung kümzüka ayutsü merangtsü ta parnokisa metetdaksü.

DPP-i lokti temenentem anema nokdaksü aser tajungtiba shimba maparen tenzüktsü aser pei dak aketba sempet amshia peisasa purapiteta inyakba mapatem takok tashi yaritsü ta parnokisa sangdongogo.

(Maneni tapak 11 nung...)



## Dimapur Police-i 'Medical First Responder Team' tenzük



**Dimapur, May 17 (TYO):**

Dimapur Police-i "Medical First Responder Team" squad ka tenzükogo aser iba nung Ambulance ka aser Motorcycle 2 lir.

May 15, 2017 nü iba squad tenzüksüba sentong nung Deputy Commissioner of Police (Traffic), P. Sendongmeren, NPS-i ashiba agi, "lendong atalokba sülen mezüngbuba ghonda dang "Golden Hour" ta ajar aser iba mapang medical treatment shitak agütsüra, nisung taküm ka kümzüksü

Medical First Responder Team tenzükba ya nisung takütem kümzüksü aser sensotem yaritsü atema lir, ta P. Sendongmeren-isa shisem.

Iba sentong nung Commissioner of Police, Dimapur, Limasunep Jamir, IPS-i pa indang office nungi Squad ji tenzüksü.

Iba squad ya Dimapur Traffic Police kübok mapa inyaksü aser Medical First Responder Team ji Traffic Control Zone-I aser Zone-II

akok." nung gari dak sendakba lendongg ajurudang yariteptsü.

Central Training Institute, Toluvi nung Dimapur Traffic Police aser Homeguards nungi nisung 12 nem first aid aser Pre Hospital Treatment indang training agidaksü.

Gari lendongtem dak sendakba nung item mobile number ajanga tongteprateptsü akok.

Dimapur Traffic Control-I @ +91 7085055038  
Traffic Control-II @ +91 7085055039

## Mkg nung Grade III & Grade IV staff Medical Examination asütsü

**Dimapur, May 17 (TYO):** Mokokchung District nung department balala nung Grade III aser Grade IV staff indang Medical Examination June 15 & 16 anogotem alitsü, ta Chief Medical Officer, Dr. S.S. Akaba Longchar-i sangdong ka nung metetdaksü.

Medical Examination ji DPO (UIP/RCH) Mokokchung nung alitsü, anungji Head of the Department temi June 9, 2017 matongdang pei pei staff indang tenüng tarensen agütsütsü metetdaksür, ta paisa ashi.

Iba dak sendakba nung

Department shinga dangia osang balala meyoktsü, ta CMO-isa metetdaksü.

**Anogo: 15th & 16th June 2017**

**Tesem: Office of the DPO (UIP/RCH) Mokokchung, near IMDH Mokokchung**  
**Mapang: 10: 00 AM nungi**

## S.P Kohima-i National Highway atema tetuyuba agütsür

**Dimapur, May 17 (TYO):** Kohima Police-i National Highway nung garitem senzüksü tetuyuba tasen kar agütsüogo.

Dimapur nungi Kohima-i aruba garitem ajak Peducha nungi 10 mile, Tsiesema leni

yoktsü aser Kohima nungi Dimapur-i aoba garitem ajak Zubza CRPF camp nungi Kiruphema-i yoktsü, ta Senior Superintendent of Police, Kohima-i metetdaksü.

Kohima aser Dimapur tsüngda National Highway

yanglushitsü atema iba temelenshi ya alir. Anungji, Kohima aser Dimapur tsüngda senzürtemi Highway meyangluzüksü tashi timtema arema atatsü mepishir, ta S.P. Kohima-isa sangdong nung shia lir.

## Mkg DC-i admit card & calling letter atema metetdaksür

**Dimapur, May 17 (TYO):** Mokokchung nung LDA cum Computer Assistant/Bench Assistant/Steno/DBs/House Keeper aser Driver mapatem atema tenüng agüja alir ajaki May 25, 2017 tashi DC office nungi admit card aser calling

letter agizüksü metetdaksür, ta Mokokchung Deputy Commissioner, Sushil Kumar Patel-i sangdong ka nung ashi.

Office anogo shia anepdang 11:00 ako nungi nikongdang 3:00 ako tsüngda Admit cards aser Calling

letters agizüksü akok.

Maneni, LDA/Steno/Bench Asstt atema tenüng agütsürtemi sen 180 aser DBs/House Keeper o Driver atema sen 50 agütsür admit card aser calling letter agizüktetsü, ta Mokokchung DC-isa shisem.



May 17, 2017 nü Mon district kübok Hongpoi yimtsüng nung Mon District Legal Services Authority (MDLSA)-i legal literacy sentong ka ayongzüka agidang tangokba noksa anur. Iba sentong nung village council züngsemtem, arogo lennirtem aser Hongphoi o Wangla yimtsüngtem nungi kaketshirtem aden. (Hongpoi /Mon, May 17)

## LANGPANGKONG SENSO TELONGJEM MOKOKCHUNG

32 Buba Inti Lokti Senden Sentong

Anogo :20.05.2017

Mapang :10:30 Ako

Tesentepdak : Town Hall

Omen: "Langpangkong Ayak"



Tongti O Jembir :

Wb. Sentilong, Ozukum NCS, EAC Manyakshu.

Ajungshi- Tepela O Jembir :

1. Wb. Imkongwati, President AKM

2. Wb. P. I. Imna, Executive Engineer, PWD R&B Mokokchung

3. Wb. Sayangkaba, G.B

Ketdangpurtem

Tir : Tongpangyanger Jamir (Chuchuyimlang)

Tatong Tir : Imnatoshi (Longkong)

Tongti Zülur : Arentemjen Jamir (Akhoya)

Repsem Zülur : Lanu Pongen (Asangma)

Sentong Tarensen

\*Menden Okila

\*Sarasademtsü : Rev. O.Yashi, Pastor

\*Ajungshi- Tepela O : 1.Wb. Imkongwati President AKM

2. Wb. P. I. Imna EE PWD (R&B) Mkg.

3. Wb. Sayangkaba, G.B

\* Sobaliba Ken Ka : Chuchuyimlang Senso Telongjem, Mkg.

\* "Langpangkong Ayak" : Wb. Sentilong Ozukum NCS EAC Manyakshu

\* Sobaliba Ken Ka : Longkong Senso Telongjem Mkg.

\*Osangtem agitsü : 1. Tongti Zülur

2. Metetzüngang (Audit) Luden

3. Langpangkong Kaketshir Telongjem Mokokchung.

4. Pangzüng (Resolution) Luden

5. LSTM Corpus Committee

6. Nungtet Luden

\*O Lemtepba mapang :

\* Melepzüng O :

\* Tatem Sarasadem : Wb. Bendang, Pastor MTABA.

Temetetsü :

\* Iba Senden nung Langpangkong Tsükongsanger Mokokchung alir Ao sünak abener Süngpu zünga nungi tema ajak adentsü.

\* Ajaki asen Aor sübotsü sobur sendeni arutsü mepishir.

\* Tsükongsanger keja/Loknutem nungi tebilemba (Agenda) kar lira 18th May tashi nung Ketdangpur ket tongjangma.

\* Mapang akiyim : Tongti O (25 mts.) Ajungshi-Tepela O (7mts).

\* Sentong temer telok chiongba mapang alitsü.

\* Sentong Timsur Langpangkong Kakatshir Telongjem Mokokchung.

\* Iba Sentong aser Anogo asoshi ajaki Sarasadema atadi.

## 9 buba Morung Lecture alitsü

**Dimapur, May 17 (TYO):** nikongdang 3:00 ako tashi May 26, 2017 nü 'The Arts agitsü.

(Film & Theatre) for Social Change' onük nung 9 buba Nagaland nungi film aser Morung Lecture alitsü. theatre producers & makers-

Iba sentong ya DABA Elim Tiakumzuk Aier (Dreamz Hall, Duncan Bosti nung Unlited), Sesino Yhosu aser anüngdang 12:00 ako nungi Sophy Lasuh nungertem lir.

## 5 AR-i prangpong-injang shibelener ka apu

**Dimapur, May 17 (TYO):** 5 Iba nisungji arishi küm 38 tain Assam Rifles sepaitemi DC Hukhetokiba ta jangjaogo aser Colony, Zunheboto nung pa ya Zunheboto kübok prangpong-injang shishilembar Ashukhomi yimer lir. Pa den ka den oset aika apu, ta Lt Col külemi apuba osettem ajak May Amitabh Sharma, PRO, HQ 14, 2017 nü Zunheboto Police IGAR (N)-i sangdong ka nung Station ket nung agütsüogo, ta metetdaksü. sangdong nungsa shia lir.



# Arunachal Pradesh nung yipru tesashi ait



Itanagar, May 17: Yipru ajanga süngtong tera dena raktetsüba agi iba anasa aliba garitem raksatsüba noksa nung angur.

**Itanagar, May 17 (Agencies):** Arunachal Pradesh nung tzunglu dena yipru tesashi aitiba ajanga nisung ka tepset aser ki aika raksaja nisung 100 shi talidak makai kümogo.

Hombar nikongtsüsü yipru aitba mapang ki ka jerepa Namsai district kübok New Mohong tesem nung alir Khonil Gogoi tepset, ta Bodhbarnü ketdangsertemi metetdaksü.

Yipru ya minute 90 shi ait aser iba ajanga ki 180 kenyongi raksatsü aser ano tanga ki kar terara raksatsü. Yipru ajanga süngtong tera dena raktetba den külemi power line tokdangtsü aser shiruru metsüba ki aser tsük bendena ayuba jen aika raksatsü.

Lekang circle nung yimtsüung aika sendaktepba lenmang süngtong tera den mekübtetba ajanga nokdanga liasü. Police aser local ketdangsertem lenmang lapoktsü mapa inyaktenzükogo.

Deputy Chief Minister

Chowna Mein shiba iba tesem nungi MLA lir, pai iba lendong nung nisung taküm samaba atema nemjema bilemba lemsatop.

Pai district administration dang yipru lendong ajang timtema aliba nüburtem nem teyari tenüngdakbatem tekaraba nung agütsüsü asoshi mepishe.

Tzunglu maneni aruba ajanga Kameng district kübok Dirang tesem nung tüzümsüung arua liasü aser iba ajanga sorkar aser kicha meyong kiojen aser oset aika raksatsüogo.

Tüzümsüung ajanga ADC Dagbom Riba'er official ki aser local MLA Phurpa Tsering'er kia dena terara raksatsü.

BSNL exchange kanga mejungi raksaogo aser iba ajanga mobile service nung kongshiogo.

Electricity, tzu agütsüba aser lenmang raksar aliba yanglushitsü asoshi ketdangsertemi inyaktar ta

osang ajanga metetdaksü.

Maneni yipru ajanga Kurung Kumey district, Parsi-Parlo circle kübok Riangchi-Poriang yimtsüung nung teraksa bener arutsüogo.

Hombar nü yipru ajanga iba yimtsüung nung ki aika raksatsüba den külemi Anganwadi Centre ka aser sentep ki ka ta raksatsü.

Süngjang tong noklang aika aser au rongtem yipru ajanga tera dena raktetsüogo.

Kasa mapang nung Chief Minister Pema Khandu lendong agi kongshia aliba tesemtem nem teyari agütsüsüba aser ki o jen yanglushiba maparen tenzüksü asoshi tetuyuba agütsüogo. Pai maneni district administration dang lendong nung takoksa aluba jenjang asadangtsü asoshi tetuyuba agütsü aser nüburtem dang iba amala lendong nungi jenbua alitsü asoshi kümanga alitsü ajungshiba osang ajanga metetdaksü.

# Arunachal sorkar mapa nung alir parnok 4 apu

**Itanagar, May 17 (Agencies):** Arunachal Pradesh sorkar mapa inyaker 4 Assam nung puogo. Parnok ket nung merok keyi teküp ka aser teret ta bener lia apuba forest department ketdangsertemi Bodhbarnü metetdaksü.

Forest ketdangsertemi ashiba agi, Arunachal Pradesh health department nung inyaktar ya Mongolbar nikongtsüsü Biswanath district kübok Dafalagarh süngo lu

nung apu. "Parnoki shiruru teküppi aser teret seret 5 shi, sen lakh 3 yong ayoktsü asoshi talir ka den jembiteper liasü. Parnoki amshiba motorcycle ana dena puogo," ta forest ketdangsertemi osangbener dang ashi.

Bushisüngdang ajanga ngutetba agi, parnok ya ozüung alema arem shiruru akhaba maparen nung densema alitsü akok aser parnok ket nung

merok keyi teküp aser teret bener alibaji Assam, Kaziranga National Park nung akhaba asütsü akok. taoba küm November ita forest ketdangsertemi Assam nung Manas National Park nungi Royal Bengal tiger ka teküp nguteta liasü. Iba keyi ya mim chidaksür südaktsüba liasü. Iba dak sendakba nung taoba mapang National Democratic Front of Bodoland (NDFB) telungpur ka apu.

# Bal Bhavan School nung admission sen 5 dang agir

**Guwahati, May 17 (Agencies):** Uzanbazar nung Bal Bhavan School ajanga sentong tasen ka asateta lokti nung temelenshi bener arutsüdar.

Iba school nung kaketshirtem admission atema sen 5 dang agir. Admission dak sendakba nung maparen indang asüngdangdang principal-i ashiba agi; "Arishi küm 6 nungi 16 tashi nung kaketshir mashi kati iba school nung parnoki molungba angazüktsü akok."

Iba school ya 'recreational centre' ka lir aser idaki 'extracurricular activities'; tsüngsang, music, computer, art aser jilushi amala nung tangazükba balala agütsür. Iba school nung tetsür tebur, tamangba yimsü aser caste nung ajemdaker shinga mebandanger. Parnoki school nung Assam tesem ajak nungi tanurtem agizüker aser parnok sempet sayatsü asoshi

maongka agütsür. Bal Bhavan indang nükjidongji sensaker tanurtem nem 'extracurricular activities' agütsüsüba dang masü saka parnok asoshi tangazükdak tesem tajung ka agütsüsü asoshi lir. Iba ajanga tanurtem raksaa aotsü nungi kümzüker. Counsellor tem aser principle-i ashiba agi, tanurtem nem text book ajanga tangazükba balala agütsüba dang masü saka sobaliba aser alimar yimya yimpong balala angazükdaksür.

Kidang kibong nung mesüngjemteti aser mepelai aliba tanurtem atema achool ya parnok ki ama kümogo. School nung tanurtemi ashiba agi, parnok Bal Bhavan School nung azüngba atema kanga pelar aser tesayurtem sülen takok tashi tashi angaa anidaktsü. Music nung jangraba kaketshirtemi ken aser musical instrument balala yanglu tenzükogo.



May 17, 2017: Whitley Awards 2017, koba dang Green Oscar taa ajar, iba tetushi sempet asoshi Assam tsür Purnima Barman nominate süogo. Lai Greater Adjutant Stork aser iba ozü aliba tesemtem kümzüka ayutsü meranga inyaker. Iba osang Mongolbarnü metetdaksü.

# Meghalaya People's Committee-i Aadhaar Enrolment Drive anemer

**Shillong, May 17(Agencies):** Meghalaya People's Committee-i Bodhbarnü state sorkar dang 'Aadhaar enrolment drive' anendaksütsü asoshi aser yamala maparen tangsa tang agintsü asoshi akhang.

Aadhaar enrolment maparen iba ita East Khasi Hills district nung tenzüksüba osang angazükba sülen parnoki Chief Minister Mukul Sangma dangi shidi ka zülu. welfare scheme balala angutsü asoshi Aadhaar card ya "mandatory" masü ta Supreme Court-i ozüung ka agüja aliba parnoki CM nem lephsia metetdaksü.

"Yaküm 1955 Citizenship Act yanglushiba sülen lisopur dak sendakba nung ken o adokba den külemi Aadhaar enrolment ken o ajanga chichiba India lisopurtem nem tekümzüka agütsüsü melen lokti jenjang anokshitsüogo aser iba ajanga nüburtem tetsüba nung temzüng ozüung dak sendakba nung tebilemtsü aika adok

daktsüogo," ta iba lokti nung züngsem Rev. P.B.M. Basaiawmoit-i shidi nung zülutsü.

Mr Basaiawmoit-i ashiba agi, Aadhaar enrolment dak sendakba nung nüburtem dak tetsüba ka lir aser iba ya Deobarnü tashi nung state nung nütsüung lakh 30 dak tema aliba nungi Meghalaya nung alir parnok 2,78,906; shilem 9-i dang züngoksema aliba ajanga sayur.

"Tasa balala adonga state nung aliba nüburtem Aadhaar nung züngoksemdaktsütsü merangbaji tai lir," ta paisa ashi. Maneni Basaiawmoit-i ashiba agi, Assam aser Jammu & Kashmir den külemi Meghalaya-a maparen balala atema Aadhaar number agütsüsü nungi jenbua lir aser iba osang ya ajaknem metetdaksütsü nungdaker. Committee-i maneni Aadhaar enrolment magi tsüngda lokti nem iba maparen metetdaksüba sentong ka agitsü akhang.

Tura, May 17: East Garo Hills (EGH) nungi Arishi küm 31 tain tebur ka shiba Chennai nungi kidangi aruya alidang Andhra Pradesh, Rajamundhry tesem nung sama pa taoba hopta Odisha, Behrampur tesem nung ngutetogo. East Garo Hills, Songsak Norek tesem nungi Kalingson A Sangma ya April 27 nü teku den Chennai-i mapa bushi ao. Aji saka meyipa aruba mapang pa Rajamundhry nung chiyongtsü kar alitsü asoshi kimai adoka aliba mapang nung pa amenba train station doktsür oadok.





# TIR YIMYIM

## YIMOBILEM (EDITORIAL)

DIMAPUR THURSDAY, MAY 18, 2017

### Peisasa züsentetba

L aishiba nung Tenüngsang Ken 128 nung asen ket agi züsentetba achitsübaji tepelatsü aser iba jagi asenok junga alitsü ta shia angutsü. Atangji, aluyimertemi iba tepelaji meteta lir. Chiyongtsüsa süaka tangar dang nungi alia chiyongba o asen ket agi züsentetba chiyongba na nungi anguba tepelaji khenyongi balaka, kechiyong peisasa züsentetba chiyongtsüjisa temang atema tajungba dang masü saka iba jagi asenok aküm kümdaktsür. Tanübo asenok teimbaka tsümartem ket agi züsentetba dang alia chiyonger asünungji pei ket agi züsentetba chiyongtsü achiba nungi anguba tepela mangu tashidak dang bendener. Tsümartemi züsentetba chiyongtsütem ya jang nungi shir aonsutsü aser süngjanglijang tashi tekaratiba nung teimtiba züsentettsü asoshi mozü amshia züsentetba chiyongtsütem lir. Ibaji dang masü saka ano anogo aika tamajung mekümi tang yatali mesüra ongzüklü amato angutsüsa mozü tzü raker sentsüpranga tang alu nungi bener aruli amato kümdaktsür ayoker. Item ajakji mozü dang lir aser item mozütem ajakji asen teboki alur. Aji oda, tsümartem ket agi züsentetba chiyongtsü alia achiba nung sen endokba dang masü saka tashidak bendener. Iba jagi tanübo akok tashi tsümartem dang malii asen peribo asensasa züsentettsü asoshi ajungshiteper. Atangji, asenoka tangar jilu bena nübo aika matsükyonga alu koka inyaker aika züsentettsü asoshi mozü amshia alu ayimer. Ibajia maitsür, kechiyong takokeribo tangar dang ayoktsüsa aika züsentettsüjungger. Ajisüaka, mozü amshia ayimba nung ajuruba takoksa aika rongnung kaji ali raksar anungji tarutsü chirnurtem asoshi alu ayimtsüla masü ali takong toktsür asütsü. Item ajakji kanga junga bilemdanga inyaktsü alinungji, akok tashi asenokbo mozü mamshi ayimba lu 'Organic farming' nung temulung agütsü jungger. Kodang asenoki mozü mamshiba lu yimdir, item lu nung züsentetba jang, aonsutsü aser süngjanglijang alitsü asoshi tangar bushiyonga arutsü aser jenjang tulu agi ayoktsü. Tanübo, tzü mopong ajak menenadoker aser chiyongtsü nunga mozü dang, anungji takokertemibo alima talang nungi asüyonga mozü mamshii züsentetba chiyongtsütem bushia achir aser ajemer. Iba nungdakji meteta asenoka kibong shia pei peribosa züsentettsüsa ozüng agi alu yimdaktsü nunga koma süla (?) ta asüba tasüngdangba ka taoba hopta nung benoka bilemdangogo. Atangji, kechi mapa südir süaka pei ajungtsü atema ozüng küma latetter inyaktsübaji menügdaker saka tangatetba agi inyaktsüla. Aji oda, ozüng agi aluyimba nungji tamakok alutsü saka iba tasüngdangba jagi tangatetba ka agüja nübortem shisaboludaktsünübaji pei peribosa peisasa züsentettsübaji shitak saka kong, koma aser kechi lu ayimtsü ta bilemdangdaktsüner. Pei peribo peisasa züsentettsüla ta ajungshiba tetezüji alu tuluka ayimtsü indang jembir masü saka aseni asensasa inyaktettsüsa tsük lu, aonsutsü lu, süngo lu mesüra süngjanglu tilala ayimtsü. Ibaji ali alirtembo ki temeket nung atsü (garden) nung ayimtsüa akok. Mozü mamshi ser süngotu agi alitemo kümdaktsür asen peri züsentettsüsa ayimtsü asoshi ali tuluka menügdaker. Ano, alu nung tsünüsenpongtsü chitsüba longpen aser yimzüba shiruru tila tepsettsü asoshi mozü masü nashi tetsü (cow) natzü enzüka tzü den meyokteper araker. Item ama pei peri züsentettsü atema aluyimba maparen angazüktsü teyari nungdakra onokia yaritettsü. Atangji, Kohima aser Dimapur nung alirtem aika alu ayimtsüsabo ali makatsü saka pei kima tilaka nung asüyonga naro tsünür amai aonsutsü danga kar adokdaktsütetra, ibajia tajangzük tulu asütsü. Iba amaji Kohima aser Dimapur nung alu ayimtsüsa ali mekaaka nisung ajak pei tsürabur yimlenbo alu ayimtsü asoshi ali peria kar, anungji oagiji yimtaklirtem den külemi ajungshitepa ayimtsüla. Iba amaji kodang asenoki ajungshitepa peisasa pei peribosa züsentettsü atema alu yimdir, temang nungi asentzü sendoka temang pongpapongpaa akümstü aser pei ket agi mozü mamshi züsentetba chiyongtsü achiba agi tepela aser aküm angutsü aser temang anema alitsü. Ano, idangjiang tsümartem dak metaloker aliba tia nungi nüjiso angutsü.

# OLEMSABANG

## NI KÜ TANGATETBA KA NÜBURTEM DEN LEMSATEPNER

-R.Imkong Lkr. 4th Mile, Diphupar: Dimapur

(Maneni taoba adok nungi...)

Yangi kanga tang temulung shirangtsü ka lir ta ajak nem bilemdaktsüner, kechiba ta süra lokdi tentet aikati "trust" ta tenüng amshia result adokdang tajungtiba rogo nem senpet aser sempet-tem agütsüyonga arur aser parnok nükjidongji koda ser ano tarutsü mapangtem nunga tanurtem tajungba adokdaktsütsü ta tangatetba tajung yur inyakteper. Saka yangi tera tebilemdangtsüka ka ajiteta yabo melenshi nung kangasa ajungtsü ta kü tangatetba ka ayimoktsür.

**Reprangang, taküm tatidang result adokba nungji tangar nisung "non-local" tama ser adoka angur, yamai:-**

<u>Sl.No</u>	<u>Name and School</u>
1.	Deepa Mishra, Holy Cross Hr. Sec. School, Dmr
2.	Nandita Paul, Pranab Hr. Sec. School, Dmr.
3.	Harsh Jain, Don Bosco Hr. Sec. School, Dmr.
4.	Suhana Begum, M.G.M Hr. Sec. School, Dmr.
5.	Ananya Kumar Das, St. John Hr. Sec, School, Dmr.
6.	Leah Pathan Khan, Holy Cross, Hr. Sec. School, Dmr.
7.	Shruti Jain, St. Mary's Hr. Sec. School, Dmr.
8.	Nemdeingah Singson, Mezhur Hr. Sec. School, Dmr.
9.	Megha Singhanian Agarwal, Hr. Sec. School, Dmr
10.	Muskaan jain, Holy Cross, Hr. Sec. School, Dmr.

### Commerce Stream

1.	Paulami Sen, Christian Hr. Sec. School, Dmr.
2.	Roseline Pojar, Minister Hill Baptist Hr. Sec School, Kma
3.	Rajdeep Nath, Pranab Vidyapath Hr. Sec School Dmr
4.	Rasheb Banik -do-
5.	Payal Kumari Sharma, S.D.Jain Hr. Sec School Dmr

Aser ano aika lir aser Science stream nungia aikasa temaba jenjang nung lir.

Tanü asüng tazüngerter tera adoka tangar non-local-purtem den aritepa züngerter tang ashi, tejenba putu mapang asen tetsürtemi süpeti tejen ka agia petir kümtem süitemasa yok aser teburtemia langtem ka agir kümsa süitema yok. Saka iba mapang nung non-local-tem Science practical zünger mapa tapu aika inyaka liasü ta otsü-i ashir. Aser tang yabo joko generation terbuba, ter anabuba nung ayaoka "advancement" tejak leni odar. Saka parnok apibo asenok education nung tangang tetenzüker lir.

Süra kechiba asenoki item kanga advance purtem ajungshia senpet aser sempet-tem agütsür. Ya tangsa tang anenadoktsüla aser asen nisungtem ajungshia education tajung ngudakja ajungshitsübajiang tongtipangba lir. Aser ano asen Aortem asen Nagakin ajak dang tamanir asüba tu tanübo tesülenang atsüngshir ta paper nung aiben tang zülüasa angur. Saka asen Aortem ajungshia tejakleni odaktsütsü melena küm shia result adokdang Mayangnokcha Award tangar kintem nemang ajungshia senpet aser sempet agütsüba angudang kü mulungjang nung kangasa kukua aiter.

Ni asen tetsü tebou shin o ka bilemteta yangi agütsür, yamai, "Tortoise" kürasa melemdang "Bat" la sa apua akümer ta ashiba ama, asen Aor Aotsürtem Education tajung adokdaktsütsü meji nung asen Naga nungersa ser-a tangar kin nem senpet aser sempet agüja ajungshiasa ali nungbo asen Aor-ji maneni tesüleniangsa atsüngtsü masü na? ta AKM pur nema khen bilemdangdaktsüner, ashiko parnoki rajemtsü ta ni amanger.

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir**





## AO BAPTIST AROGO MUNGDANG

IMPUR, MOKOKCHUNG, NAGALAND.  
Youth Ministry

NO: AB 08 C03/2016-2017/ 13

Dated Impur, the 16th May. 2017

### AO BAPTIST AROGO MUNGDANG YOUTH MINISTRY (ABAMYM) AJANGA MULUNGNEN O

Tamasa ABAMYM ajanga ajak dangi Tsüngrem temeim salem lemsateper.

2017 ABMYM ajanga Clean election campaign- Bullet And Bikers Rally sentong May ita 12-13, nung ayonga agiogo. Iba sentong agiba nung arogotem, lanur telok, kija aser lokti palalai tajungtiba nung yaritepba asoshi tepelaba lemsateper. Tsüngtong marutetaka iba Mulungnen O ajanga nenok ajak dang kanga pelaba lemsateper. Tsüngremi nenok maneni moajang. Arogo, kija aser lokti palala shirnoki iba Clean Election campaign- Bullet And Bikers Rally, nung yaritepogo item tenüng kar yamaya-

1. Khar Baptist Arogo
2. Alongkima Baptist Arogo
3. Mangkolemba Baptist Arogo, ADC, Town Council, 9 wards executives, Watsü, Mangkolemba Ao Lanur Telongjem, Mangkolemba Town Students' union, social concern, aser schooltem nungi.
4. Nokpu Baptist Church, Youth aser Village Council
5. Longchem Baptist Arogo
6. Saring Baptist Arogo
7. Tzüdikong Baptist Arogo
8. Rajeswari Karuna School, Tuli.
9. Tuli Town Baptist Church, Tuli College
10. Merangkong Town Baptist Arogo
11. Changtongya Town Baptist Arogo.
12. Chuchuyimlang Baptist Arogo
13. MTBA, ADC Mokokchung, aser Mokokchung Lanur Telongjem.
14. Media personals
15. CMO Mokokchung nungi Kari den, Dr. Yanger, male nurse ka driver aser First-Aid Kit.

Kibubar wadang nung,  
Sd/-  
Toshi Sanglir  
ABAM Youth Secretary

## ANO GO ABEN TSÜNGREM DEN

### AMANGBA NUNG TEPELATSÜ

"Atangji onok telungjemji Tebu aser Pa Chir Yisu Khrista den lir." -1 Yh 1:3

Asenok taküm ka asoshi tenük küli ya kanga tongtibang lir. Otsü aika angashir aser azünger saka asenok asoshi jangratemtsü kaji aseni anguba tatalokbajisa lir. Kodang asen tenük kuli lidir iba nungji asenoki asen mulung nung ayur, mamateter, aser otsüji tejangjaba shiteter. Yisu nütsüng 12 rongnung ka, tambur Yohani shiti ka züludang, Yisu indang pa tenük küli tejangja yamai shia züluba angur. "Aser takümüji jungkai adok, onoki aji angu aser iba indang kuli asür; aser taküm koba Tebu den liasü aser onok dang jungkai adok, iba teti tatem makaba taküm indang onoki nenok dang sangoktsür" 1 Yh 1:2.

Yisu nütsüngtem tenük külittem ajanga, Khrista dak asen tamang ayutsü nung yarir. Parnok amaji asenoki Pa tenük agi monguaka, asenoki amangogo ta ashiba tamang akatsüla.

Atangji, aseni tanü Yisuji asen tenüki monguaka aseni teti tenük küli angubaji Tsüngrem O ya lir. Asen tenüki azüngba amaji asenoki amangdi.

#### SARASADEM:

Oba Yisu taküm otsü onoki amangtsüsa tenük küli Nü O nung züngtettsüsa toktsüba asoshi Nü dang pelar. Amen.

## Muslim sayutsüngir kati FIFA dang kangki tamaitüsü sayuba nokdangtsü tuyuba aitsür



**May 12 (Agencies):** Muslim cleric kati Twitter nung FIFA dang Khristan asayartemi goal agütsüba sülen kangki tamaitüsü sayuba nokdangang ta ashiba atema nisungtemi pa aitsür. Saudi nung tamangba lennir aser King Saud University, Riyadh nung professor of religion, Mohammad Al-Arefe-i tawa tu Twitter nung, "ni asayartem indang video clips nguogo aser parnoki takok anguba sülen parnok teku nung kangki tamaitüsü sayur. Iba ya FIFA-i nokdang asü masü" ta metetdaksü.

Al-Arefe-i Twitter nung pa sülen anidaker million 17.4 den iba ashishitep aketba osang sangdongba sülen, nisung aikati pa aitsütsü tenzük.

Italy club Roma nungi Egypt nung football asayar ka atishia, nisung kati "Ni tiyazü meshitettsü. Mohamed Salah aser tangartemi goal agütsüba sülen apudaker sarasademmer aser shingiaia parnok memerenshir. Saisapong ketdangsertem nem saisapong dak sendakba maparen yujang" ta metetdaksü.

"ISIS-i kangki tamaitüsü mamshitsü nokdang. FIFA nung Tir inyaksü atema al-Baghdadi (ISIS tanishisang) shimba sülen, asenoki Al-Arefe indang onükji jembidi" ta nisung kati pa luja langzü.

Ano, nisung kati "Khristan,

Sunni aser Shia nung telok ka nung temulung ka küma longjemdaksüba saisapong nung tebang tait. Nisung ajaki pei tamangba yimsü sülen anidaksüla. FIFA moajang" ta metetdaksü.

Sunni nung sayutsüngiri tali bilemloka oa Islam amanger aser pa ya alima nung aikati meteta lir aser ashisheper. Pai Islamist nung dang Syria nung oa raratsü ayongzükba sülen linük aikati pa marutsü nokdang.

Tan ita tetenzüklen tu Denmark-i küm ana atema Al-Arefe nokdangba osang metetdaksüogo.


"Sorkari Denmark nung tesempatsü osang proktertem marudaksütsü. Sayutsüngirtemi Danish nung dang tetsür aser tanurtem dak tashiyim mapa inyaksü, caliphate ulushitsü indang tebilemba lemsateptsü aser asen linük tamendakdak anokshitsü ajungmesotsü memelatsü" ta Immigration Minister Inger Stojberg-i ashi.

"Item ama nisungtemji Denmark-i arutsü memelar" ta paisa shisem.

Shia Muslim Al-Khoei Director, Yousef Al-Khoei-ia ashiba agi, Al-Arefe-i telemsa adokdaksütsü indang jembir.

Tesüba mapang Muslim nung sayutsüngir Al-Arefe-isa, kinungbo kati kinungtsü azioktsü atema züka merenshi nunga kecha masü, ta ashi.

## North Korea nung Khristan renloka aoer: Kim Chung-seong



**Washington, May 16 (Agencies):** North Korea nungi jena aoer Kim Chung-seong tang Khristan missionary ka ama inyaker aser pia ashiba agi, Khristanem reshikangshiba asüba linük tamajungba asüyonga North Korea nung arogo inloka odar.

"North Korea sorkari tetsübutibaji Osangtajung prokshia aotsüba lir, kechiyong Laishiba aser Osangtajung ajanga ochi jembir. Tammang takdang ka nung tesangwa yalokra, takdangji tesangwa akümtsü" ta Washington, D.C nung World Summit in Defense of Persecuted Christians alidang Kim Chung-seong-i ashi.

"North Korea sorkari nokdangtsü merangkaka, Khristanem tamang tulu küma odar aser inloker. Sorkari North Korea nung Osangtajung nokdangtsü atema parnoki akokba tashi inyaksü, saka asenoki asen teka agi anü tesangwa menokdangtetba ama lir" ta paisa shisem.

Linük 60 dak tema nung reshikangshi ajuruba Khristanem yariba telok- Open Doors-i ashiba agi, North Korea ji Khristanem kanga reshikangshiba linük lir.

"North Korea nung Khristanem sorkar ketdangsertem, kidangertem aser karbo pei apuani mesüra tanur dang miimshitsüsa tia ajurur. Nisungtemi tali tenük yokba aser nüka mitba ajanga tamangertemi tenük lapoker ang sarasademmer aser tetushi mesüra tekülem atema senteptsübjaji tamakoktsü" ta Open Doors-i ashir.

"North Korea nung senso ajaki Kim'er kibong külemtsü atema ozüng lir ajak aser shirnoki iba tetuyuba sülen manidakdir, parnokji apur, tepuokdak ayur, reshikangshir mesüra tepseter. Khristan kibong ajunga hard labor camps nung puoker aser parnok kümshia reshikangshi, tali belemba aser yatzüra ajanga asür." ta parnokisa ashi.

Nisung kar linük toktsür China adena South Korea-i aotsü merangdang pura, parnok tepseter mesüra taküm piyong atema tepuokdak ayur, ta Open Doors-isa metetdaksü.

Kim Chung-seong-i alima nung Khristanem dang North Korea nung tamanger tem aser tamangba nüjiso angutsü atema sarsademjang ta mepishia metetdaksü.

"Ni alima nung Khristanem dang North Korea Khristanpurtem atema sarasademjang ta mepishir" ta pai osangbener dang ashi.

North Korea sorkari taila network-i Korea Christian Association ta ser amshir. Iba ya ajanga parnoki tangar dangbo tamangba yimsü nüjiso agütsür ta sayur saka shitakbabo parnoki iba network ajanga linük nung Khristanem metettsü meranger, ta Kim Chung-isa metetdaksü.

Kim-i Far East Broadcasting Company den yaritepa, North Korea dangia USB drives aser SD memory cards ajanga Laishiba osang, Khristan ken aser alima osangtem yoker, ta CAN-i metetdaksü.

"Ajak dang tongtipangtiba mapaji North Korea nung temulungjang nung Yisu Khrista lidaksütsü atema lir, kechiyong ochi ajanga na talenba nung salatsütsü. Ozü North Korea adianu ajak dangi iba ochiji atongtsü aser angatetsü atema sarasademtsür" ta Kim-isa metetdaksü.

**OLONG PAITEP # 4425**

		1				2	3			
	4			5						
6						7				8
						9				
			10							
11									12	
			13							
						14				
15										

**TIPILEN**

- 2. Tebenjem, tekümküm mapang - (5)
- 4. Inyakdaktsü - (5)
- 7. T \_ \_ \_ ng - (3)
- 9. Ghonda metsür pezü - (5)
- 10. Tzü ayimdak - (5)
- 11. Mapang matongdang - (5)
- 13. T \_ \_ \_ m - (3)
- 14. Senyur - (5)
- 15. Metetjem - (5)

**LANGTSÜNGLEN**

- 1. Tanishir / Lokti anir - (5)
- 3. Kecha mait, maka - (6)
- 5. Ajurunü / Ngunü - (6)
- 6. Tenüng kasa - (7)
- 8. Ayong tila - (7)
- 9. Tzünglu nokdangba - (6)
- 10. Tarutsü indang shiteterem - (6)
- 12. Tzü kongadok - (5)

**OLONG PAITEP # 4424 TELANGZÜBA**

**TIPILEN :**

- 1. Tatem, 4. Ozü, 5. Amajok, 7. Anem,
- 8. Chi, 10. Tai, 11. Tezü, 13. Semzük,
- 14. Ber, 15. Aener.

**LANGTSÜNGLEN :**

- 1. Tajung, 2. Taküm, 3. Mori, 5. Asentzü,
- 6. Shimtet, 9. Tzümar, 12. Mera,



**ALOKBA DANG KOTAKTENYAR KATI ASÜNGDANGER**

- K/tenyar** : Hi!! Alok, Nagaland nung timtem tulutibaji kechi?
- Alok** : Dimapur amala nung tatsük talem mapang Power department purtemi power cut asüba asütsü.
- K/Tenyar** : Nenok lima nung gari lenmangbo majung saka RCC tululu ya kechiba yamai yangluteper ?
- Alok** : Onoki gari lenmang tajungji kechi dang ajar memetet. Saka RCC ta asüba yabo kanga junga meteta lir.
- K/Tenyar** : Clean Election atema naia kechi tebilemba lir ?
- Alok** : Nibo mapa kecha meinyakerji, kechi südir süaka candidate ana mesüra asem dangbosa sen meshia agitsü tebilemba lir, ni bilemer neburtemia kü sülen anidaktsü!!!
- K/Tenyar** : Süra tatem anogo nung ni o bendangtsü ta shiangno!!
- Alok** : Masü, yamaji nai meinyaktettsü, kechiba item nisungtemji tamangba wadang nung züngsem tajung kaka kümadokogo no!!!
- K/Tenyar** : Oh!!! Alok!!!!!!

Lilir : ISK, Dimapur

**TANÜBO NAI LANGZÜANG**

- Q. India nunger lanur scientist shibai Indian National Science Academy (INSA) sempet angu ?
- [A] R D Trivedi [B] Aasok Tmange
- [C] Sidharth Deshmukh [D] Aravind Kumar Rengan

(Taruba adok nung onoki langzüsü)

YASHIADOK TELANGZÜBA : Chanda Kochhar

**Happy Birthday**

TENÜNG : AYIMJEM LONGKUMER

Tasoba anogo : 18/5/16

Talidak : Bank colony, Dimapur

Jabaso Ayimjem Longkumer küm ka tashi arishi moatsü nung Tsüngrem tenüng asanger. Yamaji maneni arishi talang den anema yujang ta Tsüngrem dang sarasatemtsür.

- Oja, oba, otsü, obou aser kinungertem.



**NAIA YA METETER MA**

**MS. ANSHU JAMSENPA**



India tsür rongnung Arunachal Pradesh state nungi Ms. Anshu Jamsenpa-i Mount Everest tenemi pezübenbuba atur rongnung mezüngbuba kümogo. Lai ano maneni tenem kolaki pungobenbuba atur asütsü atema merangdagi. Ms Jamsenpa la ya tanur ana tetsü, aser lai May 13, 2017 anepdang 1:45 am nung apuso aser tenem kolakji 9:00 am nung tonga India nunger wako ka songa yutsü. Lai 2011 küm May ita nung Mount Everest-i anaben aser May 18, 2013 nung khen aser tawa agi pezüben tashi tenem kokalji tongtetogo.

**SUDOKU # 3538**

8		1		5			7	
7					6			
		4		2		8		
		7	8		2		4	
4				9		1	6	3
5		6	1					
6							5	
2	3			7	4		1	8
	7		9		5	4		

**TELANGZÜBA # 3537**

4	1	5	2	9	7	6	8	3
2	6	3	4	8	1	5	7	9
7	9	8	5	6	3	2	4	1
5	3	1	7	4	6	9	2	8
8	7	2	3	5	9	4	1	6
6	4	9	1	2	8	3	5	7
9	2	7	8	3	4	1	6	5
1	5	6	9	7	2	8	3	4
3	8	4	6	1	5	7	9	2

**OJANG LUTEP # 4030**

- ALANAGND :
- GNUN :
- GRAENEL :
- ECTIELON :
- ANGMAP :
- ONGEATRJI :
- ARPTY :
- PUTA :
- ALABLA :
- KEADOR :

**OJANG LUTEP TELANGZÜBA # 4031**

TASHI TEMETET SÜKA MASHI MANGATET ASÜNUNGBO NEBURTEM TEJAKLENI ANIR MOUTETTSÜ



Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



**Aries**  
21/3-19/4

Tanü anogo nai ner medemertem kar den monga mapang indoktsü merangang. Tangar peladaksütsü asoshi nai sentong kar yangluang.



**Taurus**  
20/4-20/5

Tanü tebilemtsü kar adoktsü saka itemji yakta süiadoktsü. Tila-teri nung na jashitsüa akok. Tamang jenjang nung asüngsashiba ajanga nai tepela angutsü.



**Gemini**  
21/5-20/6

Tanü anogo nai süngjema mongnüsü. aser iba ajanga tangar den rarabangsen madoktsü. Tarutsü anogotem asoshi tanü nai shisadangtsü mapang tajung lir.



**Cancer**  
21/6-22/7

Tanü anogo nü molungjang nung tesünep maliba den külemi mapa nunga tetsükdaktsü kar adoktsüa akok. Kokra kidang ali tajungba asütsü.



**Leo**  
23/7-22/8

Tanü anogo nai nü shisatsü azüoktsü merangang. Mapa ariteba inyaker nikongdang anisüngzüktsü mebilemtsüla.



**Virgo**  
23/8-22/9

Tanü anogo kari nü nübo aginüsüa akok, anungji nai yaritsü merangang. Nikongdang nai mapa tasen tenzüka inyaksü merangang.



**Libra**  
23/9-22/10

Tanü anogo nai nungdakba pur kar yaritsü merangang. Kinünger aser medemertem den mapang indoktsü anogo tajung asütsü.



**Scorpio**  
23/10-21/11

Tanü anogo na tera azümesena alitsü aser nai medemertem den mongnüsü. Lokti kar nung nai shilem agitsüa mapang arutsü.



**Sagittarius**  
22/11-21/12

Tanü anogo na lokti kar nung adentsü aser nai medemer tasen kar yimtettsüa akok. Nikongdang kinungertem den mapang indokang.



**Capricorn**  
22/12-19/1

Tanü anogo nai tarutsü asoshi sentong yanglutsü merangang. Aser medemer kar nungi na shisatsü agitsü mapang tajung asütsü.



**Aquarius**  
20/1-18/2


Tanü anogo nai osang tajung kar angashitsü südi. Nü mapa mesüra kaketshirtemi wadang nung maongka mesüra jenjang tasen kar angutsü akok.



**Pisces**  
19/2-20/3

Tanü anogo tongtimbang nisung kati na yaritsüa akok. Nai tangar angatetsü merangang aser iba ajanga na asoshi jenjang tajungba akümstsü.

## American Idol nung Katy Perry-i tetendanger mapa inyaksü



**May 17, 2017 (Agencies):** ABC indang 2018 American Idol nung tetendanger asütsü asoshi mezüng Katy Perry tenüng sangdongogo.

ABC indang American Idol season 15 tashi agia arur taoba küm April nung tembanga liasü aser iba sentong nung shilem agitsü asoshi maongka agütsüba pelar, ta lai ashi.

"Sempet tajung aika alir indang pongmang nungi asangsang dangi anir arutsü asoshi 'American Idol' nung ni mezüngbuba tetendanger shimba asoshi tushia bilemer. Ni teti ken tasen angar aser kentener lanurtem dak nungi sempet tajungtiba adokdaktsütsü kanga yongyar," ta 'Chained To The Rhythm' ken atenla-i ashi.

New York City nung 2017 May 16 anogo sentong ka aliba mapang ABC ajanga iba iba show tanaben nüburtem dangi bener arutsütsü osang ya sangdong.

"Katy Perry-i anir iba 'American Idol' tenzükshitsü maongka anguba asoshi onok

kanga pelar. La ya kangadang sempet tajung aketba nisung ka lir aser la ama tasü tait aser sempet aketer kati lanurtem nem parnok pongmang agi asangsang kümdaktsütsü ya koda jangratemsü. Onok kanga tia kaogo," ta ABC Entertainment tir, Channing Dungey-i ashi.

Mongulbar anepdang 'The Ellen Degeneres Show' nung shilem agiba mapang, lai tajangzük alitsüsa melenshitsüba ajanga parnoki ni tetendanger ka ama shimtsü südi, ta Katy Perry-i ashi.

Ellen Degeneres ya tamalen 'American Idol' nung tetendanger ka liasü aser lai "'American Idol'-i tanaben arutsü," ta ashidang Katy Perry-i 'Hao' ta tekolak arakzua ashi.

2009 küm Paula Abdul-i iba show toktsüba mapang Katy Perry ya 'guest judge' ka ama arua shilem agia liasü.

## 2018 Oscar sentong Jimmy Kimmel-i host asütsü

**Los Angeles, May 17 (Agencies):** Taküm Oscar sentong kanga dang takok ngua leniba sülen nungtugu TV host Jimmy Kimmel-i 2018 Academy Award sentonga paisa host asütsü.

Pai 90buba Oscar sentong 2018 March 4 nü agitsü alibaji host asütsü aser Michael De Luca o Jennifer Todd nati produce asütsü, ta osang ka ajanga metetdaktsü.

Iba osang ya Academy of Motion Picture Arts and Sciences-i Mongolbarnü Twitter ajanga metetdaktsü. "Shingaiia Jimmey Kimmel, producers Michael De Luca o Jennifer Todd nungeri ayongba amai benjung mayongzükttetsü! Oscar 90buba nung shilem agitsü pelashishi jaoker," ta parnoki zülutsü.

Kimmel 89buba Oscar nung shilem agitsü asoshi maongka



Twitter nung asaya menüa liasü.

"Oscar sentong tanaben host asütsü asoshi kü dang asüngdangba atema kanga pelar. Ni envelope shidak lapok ta amanger," ta pai post sütsü.

"Oscar sentong host asüba to kü career indang highlight liasü. Nenoki taküm oscar tatembang onoki benjatsü ta bilemra 90bubu anniversary show atema onoki kechi renema ali ataa liang," ta academy ajanga osang ka sangdongba dak sendakba nung Kimmel-i asaya menüa ashi.

De Luca aser Todd natia iba sentong nung shilem agitsü asoshi yongyaa bilemba lemsatop. "Taküm nung kendang ajangshidangtsüba sentong nung aibenbo anaben tashi shilem agitsü asoshi maongka mangur aser ano ajia 90buba oscar nung shilem agitsü asoshi lir," ta denati ashi.



May 17, 2017: "Ismael's Ghosts" film nung shilem agirtem; Charlotte Gainsbourg, Mathieu Amalric, Marion Cotillard aser director Arnaud Desplechin, (tachichi nungi tabelen) nunger 2017 May 17 nü France, Cannes nung 70buba Cannes Film Festival melapok tsüngda tangokba noksa nung angur. "Ismael's Ghosts" film ya French director Arnaud Desplechin-i direct asü aser film festival tetenzük sentong nung sayatsü.

## TAN HOPTA ATEMA - KOMA SÜLA ?

**Q Nagaland nung General Election ya taküm 2017 kümsa agi nunga koma süla ?**

Olong 20 shi nung May 19, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzubatemi taruba Hokolbar nü adoktsütsü.



## Carpool Karaoke nung Harry Styles-i shilem agitsü



**London, May 17** Carpool Karaoke segment nung (Agencies): Presenter James Corden-i 'The Late Late Show' agitsüba osang sangdongogo.

Harry Styles-i taoba hopta pa kensep tasenba sayaogo. Taoba mapang One Direction nung züngsem ya May 19 nü Late Late Show episode nung shilem agitsü, ta osang ka ajanga metetdaksü.

"Iba osang ajanga nenok ajak peladaksütsü ta imlar. Iba hopta Brehostibarnü Harry Styles-i Carpool Karaoke tasenba nung kü den yariteptsü," ta Corden-i ashi.

Styles-i taoba mapang 'The Late Late Show' nung arua ken tena liasü.

## Lenovo Customer tasentem nem Stellar Data Recovery Software agütsütsü

**May 17, 2017 (Agencies):** Alima ajunga "WannaCrypt" attack ajanga makmakshishiba mapang ka nung New Jersey nung amener aliba 'Stellar Data Recovery' ajanga Bodhbarnü India nung parnok costumer tem kümzüka ayutsü asoshi Lenovo den longjemba osang sangdongogo.

Stellar ajanga data recovery software 'Stellar Phoenix Windows Data Recovery' India nung Lenovo customer tem nem agütsütsü. Iba ajanga taküm tepeyong atema parnok

data kümzüka yutettsü. Lenovo meyong laptop aser desktop tem tasen aliba mapang customer nem "Stellar Phoenix Windows Data Recovery" software angati agütsütsü.

"Lenovo customer shirnoki parnok indang e-store www.thedostore.com nungi computer alidir parnok asoshi Stellar indang 'Do-It-Yourself data recovery software' ajanga 'first-aid solution' ama tajangzük agütsütsü," ta CEO, Stellar Data Recovery Sunil

Chandna-i ashi.

"Onoki onok customer tem parnok data aibelena delet asüba aser formate asüba nungi kümzüka yutetba ajanga anisüngzük ka agütsüner. Iba jenjang tongtetsü asoshi Stellar den longjemer inyaksü asoshi pelaa bilemer," ta Executive Director-Services, Lenovo Asia Pacific Sudipto Ghosh-i ashi.

Stellar Data Recovery ya Phoenix data recovery Tools, Disk utilities aser in-lab data recovery services nung mongin lir.

## Karan Johar aser tanga producer dang sen meshiba atema nisung 6 apu



Karan Johar

**Hyderabad, May 17** (Agencies): Baahubali 2: The Conclusion film nung producer tem karan Johar densema parnok dang nungi sen meshia agitsü meranger parnok 6 Hyderabad police-i puogo. Parnoki producer tem dang film 'pirated copy' ka perokshitsü amokmerena sen meshi.

Police temi apur rongnung Bihar nung 'theatre' kibur ka densema lir.

Iba telok yagi producer tem

dang sen lakh 15 meshi. Paronki aji magütsüra film 'pirated copy'ji internet nung inoktsütsü amokmeren, ta deputy commissioner of police Avinash Mohanty-i tanü ashi.

Johar ya iba film Hindi version co-producer lir.

April 29 nü complain benokba nung Rahul Mehta ta ser nisung kati pa 'anti-piracy agency' nungi ta shia producer tem den tongtep aser parnok dang iba film indang 'pirated copy' quality kanga tajung ka lir ta ashi.

"Mehta-i parnok dang sample video ka sayu aser 'pirated copy' anogo tatsüka asoshi mesayatsü ta shia sen meshi," ta Mohanty-i ashi.

Producer temi police nem iba osang agütsü aser maneni pa dena jembishinüa liasü. Metha ya May 11 nü Hyderabad, Jubilee Hills tesem nung puogo.

Pai Jitender Mehta, Taufiq aser Mohammad Ali nunger pa

den külemi inyaker ta metetdaksü aser parnok asem ya tasüngnü Delhi nung apu. Jitender aser Taufiq na ya taoba mapang nunga ozüng alema inyakba maparen nung shilem agiba record lir aser dena 2015 küm Bahubali-The Beginning film 'piracy' dak sendakba ken o nung Jabalpur police-i Madhya Pradesh nung apu.

Bihar kübok Begusarai district nung 'theatre' ka kibur Divakar Kumar aser Chandan na Patna nungi puogo. Monu tang tashi meputeti jenshia senzüdar aser Divakar-i iba film digital copy yanglu, ta DCP-i ashi.

Film lemshitsü asoshi theater kibur nem 'encryption key' ka agütsür aser iba key ya amshia parnoki 'pirated copy' yanglu, ta DCP Mohanty-i ashi. Iba telok yagi mapangshia Bollywood film tem 'pirated copy' yanglur, ta paisa shisem.

## Alienware 15, 17 aser Aurora R6 aketba VR Gaming Series ka Dell-i sayaogo



**New Delhi, May 17** (Agencies): HTC den külemi Dell ajanga India nung virtual reality (VR) indang gaming series ka Bodhbarnü sayaogo. Iba VR nung ya 'Alienware 15, 'Alienware 17', aser Inspiron gaming laptop lir. Dell ajanga 'Alienware Aurora R6' densema sayaogo.

"India nung game asayarterm asoshi sabang tajungba yangluja oset tajungba agütsür. Aser iba shilem nung Dell ajanga mapang shidak nung iba mapa inyak," ta Dell India indang Consumer & Small Business nung tatong tir, P. Krishnakumar-i ashi.

Iba oset nung Intel processor tasenba, NVIDIA GeForce graphics aser 'advanced thermal cooling design' keta lir.

Alienware 15 notebook ya sen 1,64,990 nungi tenzüka angütsü aser Alienware 17 ya sen 2,14,990 nungi tenzüka angütsü.

Alienware Aurora desktop ya sen 1,79,990 nungi tenzüka angütsü.

Dell Inspiron 15 5000 gaming notebook ya sen 74,490 nungi tenzüka angütsü aser Dell Inspiron 15 7000 gaming notebook ya sen 82,490 agi angütsü.



Jaipur, May 17 : Bodhbarnü Jaipur nung Idea 4G service amenba mapang IDEA Director-Operation, P Lakshmi Narayana (teyong) aser Chief Marketing Officer, Sashi Shankar (tabelen) naden tangar ka tangokba noksa nung angur.

## Twitter dang nungiChina nunger indang Sina Weibo amshir timba

**Beijing, May 17 (Agencies):** Twitter amshir dang nungi China nunger indang 'micro-blogging' sapang, Sina Weibo amshir timba lir.

Iba company indang mezüng quarter osang sangdongba agi, taoba küm amshir dang shilem 30 agi timba küma Sina Weibo ya ita ka nung nisung million 340-i amshir.

Anogo shia iba site ya nisung million 154-i amshir aser parnok rongnungi shilem 91-i mobile ajanga amshir.

Sina Weibo den medemdangra Twitter ya China nung mamshidaksür aser iba sabang ya ita ka nung nisung million 328-i amshir.

"China nung social media tajungtiba amshidaksütsü inyakba ya Weibo ajanga sayur," ta Weibo chief executive, Gaofei Wang-i sangdong ka nung ashi.

China nung web amshir nisung million 731 lir aser parnok shilem 90 dak tali-i internet ya smartphone ajanga amshitet, ta China Internet

Network Information Centre-i ashir.

China nung Micro-blogging service nungtugutibaji Sina Weibo ya lir aser China nung tongtibang osangkaket aser TV station temia iba sabang ya amshir.

Taoba küm Sina Weibo ajanga 'live streaming app', Yizhibo/Yi saya.

Weibo indang shilem 31.4 bo e-commerce Alibaba meyong lir, parnoki 'Weibo Payment' tenzüka ajanga iba service ya amshia online nung shishilembatsü maongka agütsü.

Iba kasa sabang tenzüksü asoshi WeChat ajanga maparen balala inyakba mapang ka nung Weibo ajanga Yizhibo/Yi ya tenzüka.

Facebook, Google, YouTube den külemi Twitter ya China nung nokdanga lir.

Ita shia Twitter amshir ya shilem 6 agi timba akümer saka 'advertisement' nungi sen aazükba ya shilem 8 agi tajemba lir, ta April ita sangdong.



Minsk, May 17:- Minsk National Airport, Belarus nung May 17 nü wheelchair amshirtem anisüngzük atema designer Ekaterina Tikota-i yanglutetba süoshi, lemtar aliba tetsür ka nem agütsüba noksa nung angur.





Income tax ketdangsertemi RJD tanishir Lalu Prasad'er kiojentem mita aoba anema Bodbarnü Patna nung RJD züngsemtemi BJP state office kima lungkak aitdang police-i parnok senshidaktsütsü merangba noksa nung angur. (Patna, May 16)

### MP nung moko anemertemi GST kübok bidi züngoktsü akhanger

**Bhopal, May 17 (Agencies):** Madhya Pradesh nung moko anema nokdakertemi Goods and Services Tax (GST) kübok bidi ayokba atema saru agitsü takhangba agütsür.

Küm shia bidi achiba ajanga nisung 48,100 asüba atema iba campaign ya tenzüker.

Madhya Pradesh nung cigarette dang nungi bidi teimba ayoker ta Nandi et al ajanga bushitetba osang British Medical Journal nung adoktsüogo.

Madhya Pradesh nung bidi dak sendakba mapa inyaker nisung 7,03,487 lir.

Moko anema nokdakertemi

ashiba agi, tasürji bidi industry nung inyaker nisung 14 rongnung ka asüba ama lir.

Bidi alongertem rongnung noklang nung shilem 70 den tema tenük, tar aser nervous system nung timtem aliba aser ano parnok tesadang ka tango sashiba dak sendakba tashidak aliba bushitet.

MP State Minor Forest Produce Corporation (MPSMFPC) sentong ka nung Additional Principal Chief Conservator of Forest (APCCF) Azad Singh Dabas-i ashiba agi, sorkari bidi yangluba tendu patta nungi sen aruba dak dang temulung agütsür.

"Tashidak agütsüba tendu tou bendenertemi küm nung hopta ka nung asem tashi ka dang bendenteter. Anungji asenoki iba inyakyim melena tanga mozü tou, süngjang aser resin tem ayimtsüla aser ibaji ajanga tribal tem mapa angutsü aser sorkara sen crore aika saru sarutetsü" ta Dabas-isa ashi.

Voice of Tobacco Victims (VoTV) atema MP patron, Dr Lalit Shrivastava-i ashiba agi, "Asen Finance Minister-i Madhya Pradesh ya tajungba kümdaktsünür ta ni amanger aser pai demerit category nung bidi dak saru agitsü atema pusema nungitsü imlar."

### Modi-i Germany, Spain aser Russia semdangtsü

**New Delhi, May 17** (Agencies): May 29, 2017 nungi Prime Minister Narendra Modi-i linük asem- Spain aser Russia semdangtsü.

Modi-i Germany aser Spain linüktemji tesentaktep akangshitsü atema semdangtsü aser Russia semdangbaji St Petersburg International Economic Forum (SPIEF) atema lir, ta osang ka ajanga ashi.

St Petersburg nung June 1-3 tashi SPIEF alitsü aser iba nung alima tesem balala nungi shishilembabaren lennir meyirjang aika adentsü. Iba nung sentong nung adenertem ang Modi-i India nungi arua shishilemba asütsü atema jaoktsü, ta osang ajangasa shisem.

SPIEF mapang Prime Minister Modi-i Russia President Vladimir Putin den ajurutepa senden amentsü imlar.

Senden nung shishilembabaren, defence aser nuclear cooperation indang onüktem benoka lemsateptsü.

India aser Russia tsüngda tang Kudankulam Nuclear Power Plant (KNPP) nung units

5 & 6 atema General Framework Agreement (GFA) ka agitsü maparen inyakdar.

Germany nung Modi-i Chancellor Angela Merkel den ajurutepa senden amentsü aser iba nung Strategic Relations indang onük tongti süa jembitsü.

Küm ana tsüngda Modi-i tang agi tanabenbuba atema Germany semdangtsü. April 2015 nung pai Germany semdanga liasü. Iba mapang India ya Hannover Fair nung 'Partner Country' liasü. 2015 October ita nung Merkel-ia India semdang.

May 31 nü Prime Minister Modi-i Spain semdangtsü aser iba mapang infrastructure aser energy onüktem jembitsü.

Linük asem semdangba sülen Modi-i Kazakhstan semdangtsü. Iba mapang pai June 7-8 tashi Astana nung Shanghai Cooperation Organisation (SCO) senden nung adentsü.

SCO summit nung Pakistan Prime Minister Nawaz Sharif-ia adentsü imlar. SCO nung Russia, China, Kazakhstan, Kyrgyzstan, Tajikistan aser Uzbekistan dena lir.

AO THEOLOGICAL ASSOCIATION 31 BUBA KUMSEM INTI MUNDANG ANOGO: MAY 26 - 28, 2017 TESENTERGAR: LONGMISA BAPTIST AROGO		MAY 27, 2017		MAY 28, 2017	
<p>Lokli Libaliro nung Ochi Kulisür Toküm Integrity in Public Life</p> <p><b>BEISANGPURTEM</b></p> <p>President : Mrs. Narula Walling, Academic Dean, OBC Vice President : Mr. T. Lima Longkumar, Pastor, OBA Treasurer : Rev. Tsahi Longkhar, Headmaster, BS Director : Mrs. Taljanga Longkumar</p>		<p><b>Monday Morning Lenting</b> (8:00 am - 10:00 pm)</p> <p>Tetoklem Mapang : Rev. Dr. Mar Fongener, Principal, CTC</p> <p>Shiba Toklem Mapang</p> <p>Muarung Onok : "Integrity in Public Life"</p> <p>Tajender : Rev. Dr. Takatamjan, President, NEALEAST</p> <p>Oer : Ms. Amenla Walling, Lecturer, TTC</p> <p>Tarabuba Onok : "Integrity in the Church"</p> <p>Tajender : Dr. P. Kilemelingla, Former UPSC Member</p> <p>Oer : Dr. Moanungang, Principal, WBC</p> <p>© Lenteng Mapang TEA BREAK</p>		<p><b>Monday Morning Lenting</b> (8:00 am - 10:00 pm)</p> <p>Tetoklem Lentir : Rev. Yashita, Associate Pastor, Kohima Ao Baptist Arogo</p> <p>Lai Zünga Sarasadedentel : Rev. Maang Lemtar, Associate Pastor, Dimapur Ao Baptist Arogo</p> <p>Taraja Kan : Arogo Choir</p> <p>Kjjanghoba Lifetime Ministerial Award</p> <p>Taraja Sarasadedentel : Mr. Tsahi, Pastor, Longmisa Baptist Arogo</p> <p>Taraja Kan : CTC Choir</p> <p>Tajengram O : Mr. Tsahkung, Principal, Servanthood Bible College</p> <p>Oer : "Tajengram den Ochi nung Libaliro"</p> <p>Kibuba Benjung : Rev. Pomen Longkhar, Pastor, Mokokchung Town Baptist Arogo</p> <p>TEA BREAK</p>	
<p><b>MAY 26, 2017</b></p> <p><b>Tokolbar Aomung Lenteng</b> (Mapang: 8:00 pm)</p> <p>Sentong Lentir ATA Kantangpurtem</p> <p>Sentong Lapokitel : Youth Department, Longmisa Baptist Arogo</p> <p>Lai Zünga Sarasadedentel : Rev. I. Wali, Pastor, Changtongya Baptist Arogo</p> <p>Asir Bilembabisa : Rev. Jonggang, Pastor, Mipungchukel Baptist Arogo</p> <p>Tarur Metapala Mapang : Mr. T. Lima, Pastor, Vice President, ATA</p> <p>Tarur Pala Agitokiba : Longmisa Baptist Arogo</p> <p>Tajongkiba O : Mr. K. Tamjan, Editor, Tiriyim</p> <p>Taraja Kan : Tash Voice</p> <p>Key note : Mrs. Taljanga, Director, ATA</p>		<p><b>MAY 27, 2017</b></p> <p><b>Monday Morning Lenting</b> (8:00 am - 10:00 pm)</p> <p>Tetoklem Lentir : Mr. Jonggang, Pastor, East Dimapur Ao Baptist Arogo</p> <p>Lai Zünga Sarasadedentel : Rev. Taraja B., Pastor, Aomung Baptist Arogo</p> <p>ATA Aema Taraja Sarasadedentel : Rev. Tsahi Longkhar, Treasurer, ATA</p> <p>Tajongkiba O : 1. Mr. B. Chaba Longkumar, Parliamentary Secretary, Government of Nagaland 2. Longmisa Council Chairman</p> <p>Taraja Kan : Dimapur Area Youth Directors, H. Kantangpurtem</p> <p>Tajengram O : Rev. O. Alan, Principal, OBC</p> <p>Oer : "Manokhoba Tamang"</p> <p>Tarur Sarasadedentel : Lokli</p> <p>Semper Sarabisa Mapang : BC Tsahi Bangli, Youth Secretary, ABAM &amp; Jongkhemnagan, Youth Director, DASA</p>		<p><b>Monday Morning Lenting</b> (8:00 am - 10:00 pm)</p> <p>Tetoklem Lentir : Rev. Dr. Nollan, Pastor, Ungma Baptist Arogo</p> <p>Lai Zünga Sarasadedentel : Rev. Dr. Nollan, Pastor, Ungma Baptist Arogo</p> <p>Oxangtem Agitok aser Agenda sarasadedentel</p> <p>© Lenteng Mapang</p>	
<p><b>MAY 28, 2017</b></p> <p><b>Tokolbar Aomung Lenteng</b> (Mapang: 8:00 pm)</p> <p>Tetoklem Lentir : Dr. Aomung Fongener, CTC</p> <p>Lai Zünga Sarasadedentel : Rev. Yanger, Pastor, Longmisa Baptist Arogo</p> <p>Tir Takem O : Mrs. Narula Walling, President, ATA</p> <p>Monden Bilembabisa Mapang : Rev. Lima, Pastor, Kumbong Baptist Arogo</p> <p>Taraja Kan : Arogo Choir</p> <p>Majungram O : Rev. Nikan, Executive Member, ATA</p> <p>Taraja Kan : The Challenger</p> <p>Tajengram O : Rev. Dr. Mar Aomungchanger, Executive Secretary, ABAM</p> <p>Oer : "Ochi nung Libaliro Kibung"</p> <p>Sentong Shiang : Laishirtem, Arogo Baptist Arogo</p>		<p><b>MAY 28, 2017</b></p> <p><b>Monday Morning Lenting</b> (8:00 am - 10:00 pm)</p> <p>Tetoklem Lentir : Rev. T. Yanger, Pastor, Changtongya Town Baptist Arogo</p> <p>Mrs. Amenla, Asso. Pastor, Impur Baptist Arogo</p> <p>O jembir shia 30 minutes aser tajongzükba O jembir 10 minutes agitsü.</p> <p>5. Tarur ajak atema Longmisa Baptist Arogoi tanendak aser chiyungtsü agütsütsü.</p> <p>6. Shisatokden nung onük jembir külen onirtemi anir olemtep akatsü.</p> <p>7. Registration fee ` 200/- sarutsü aser züngsem saru ` 100/- bendentsü.</p> <p>8. Ao Arogotemi Laishir toklang tenzükerem aser pei Arogo nung laishirtem ajak anepalua Mungdangi anir arutsü mepishir. Ano Aor laishirtem wadang balala nung alir, aser tazüngertem ajak arua iba sentong nung adentsü ATA Office ajanga pelashishia jaoker.</p> <p>9. Agenda lira May 26, 2017 tashi nung ATA Ketdangpur ket tongtsütsü metetdaksür.</p> <p>10. Longmisa Baptist Arogo, sentong nung shilem alir aser sentong ajak asoshi sarasadema atadi.</p>			

- TEMETETSÜ**
- Mungdang mapang Tekülem aser Tetoshi Lenir: l/c. Mr. Tiameren, Impur
  - Mungdang Sentong Achaayanger : Mr. Tiatoshi & Mr. Nungshi
  - Kibuba Benjung Achaayangerem**  
Mr. T. Nganen Longkumar, Pastor, Wokha Ao Baptist Arogo  
Mrs. Ayangla, Associate Pastor, Artang Baptist Arogo  
Mr. Tiayanger, Pastor, Padumpukhuri Ao Baptist Church  
Mr. Sashichujang, Pastor, 2nd NAP  
Rev. Tajenlemla, Associate Pastor, Khar Baptist Arogo  
Mr. Aowapang, Pastor, Guwahati Ao Baptist Arogo  
Rev. Mar, Pastor, Lirmen Baptist Arogo  
Rev. Yangerjungla, Associate Pastor, Tuensang Ao Baptist Arogo

## Red Cross ajanga Bangassou nung tasü mang 115 ngutet

**Bangui, May 17 (Agencies):** Telungpur temi amakba sülen Central African Republic (CAR) arrtsülen aliba jila, Bangassou nung Red Cross telok nung mapa inyaktertemi tasü mang 115 ngutet aser iba asüba ya taoba mapang asüba osang dang nungi pezüben agi timba kümogo, ta Red Cross ajanga Bodhbarnü ashi.

Tasü mang ajunga ya yimya balala nung sür lia angu, karbo kotari agi aser kar bo injang agi yiruba zübu keter liasü, ta Red Cross indang local branch tir, Antoine Mbaogo Bogoi osangbener dang ashi.

"Onoki temang 115 angu aser 34 bo remogo," ta Antoine-i CAR yimtiba, Bangui nungi osangbener den jembidang ashi.

UN nung ketdangser kati civilian 26 asüba osang ka agüja lir.

Bangassou nung tensa majungba ajanga refugee 2,750 bo hopta tsüngta nung arrtsü alema Democratic Republic of Congo-i jena ogo, ta UN refugee agency ajanga ashir.

2013 küm Muslim Seleka rarartemi iba linük nung tir Francisco Bozize ket nungi tashi rakzüka mitkartem ama tesayuba balala angazüker alir

Christian anti-Balaka pur tem tepsetba timba kümogo.

Iba tesem nung tesüsa azüdokshiba indang tebilemstü ya kanga tulu kümogo, ta UN High Commissioner for Human Rights ajanga Mongulbarnü metetdaksü.

Tejangja masüba osang ka ajanga sayuba agi, May 7 nungi 9 tashi anti-Balaka tenüng nung rarar aser ex-Seleka telok tsüngta Alindao jila nung raraba mapang nisung 100 jungnüa asüba sayur, ta UN Secretary-General, Antonio Guterres indang odongtar, Stephane Dujarric-i Mongulbarnü osangbener dang ashi.



Phnom Penh, May 17 : 2017, May 17 anogo Cambidia National Rescue Party nungi lenir, Kem Sokha, Phnom Penh nung taruba local election nung tokteptsübur tetsürtem den senden amentsü asoshi aruba mapang tangokba noksa nung angur.

## Trump-i Comey dang Flynn indang bushisüng dang anentsü ashi: Reports

**Washington, May 17 (Agencies):** Taoba mapang White House national security adviser, Michael Flynn aser Russia tsüngta tesendaktep aliba ken o bushisüng dangba anentsü asoshi FBI Director, James Comey dang US tir, Donald Trump-i ashi, ta Comey-i züluba memo angur ka ajanga ashi.

Trump-i Comey mapa nungi anentsüba aser Islamic State of Iraq & Levant (ISIL) indang national security information onüktem Trump-i Russia Foreign Minister, Sergey Lavrov den jembiba ajanga White House nung rongrong tulu adoka aliba mapang iba osang ya Mongulbarnü sangdong.

The New York Times ajanga

mezüng sangdongba agi, Comey memo indang osang ajanga Trump-i federal investigation nung teka amok asü, ta tasüng dangba arutsü.

Taoba küm Donald Trump aser Russia ambassador, Sergey Kislyak tsüngta sensaksema osang tai Flynn-i US tatong tir, Mike Pence nem sangoktsüba ajanga February 14 nung Trump-i Flynn ya mapa nungi anentsüba sülen Comey aser Trump-na Oval Office nung ajurutebpa sülen iba memo ya Comey-i zülü.

White House-i iba osang ya tai ta ashir. "General Flynn densema aliba bushisüng dang anentsü asoshi tir-i Comey dang aser shingadanga bushisüng dangba osang mashi,"

ta sangdong.

"Tir, Trump-i Michael Flynn indang ken o bushisüng dangba nung teka amoshia shilem agiba kuli tejangja ya James Comey-i ashitsü mapang arutsü. Aser iba ajanga telemsa tulu adoktsü," ta osang ajanga ashi.


Oval Office nung senden amendang sorkar otsütem temai adoka osangbener aser media balala nem metetdaksüba Trump-i aitsü aser item meyim osang sangdongba ya FBI director-i bushia tapet temerenshi agütsütsüla, ta ashiba osang ka New York Times ajangasa ashi.

"Iba kuli ya Tir aser Comey-na tsüngda jembiba ama masü aser tejangja masü," ta White House-i maneni ashir.



Hong Kong, May 17 : Hong Kong, China nung aliba Government House nung 2017, May 17-nü Chief Executive, Leung Chun-ying (achichi)-i Pakistan Ato Kelonser, Nawaz Sharif ajurua senden amenba mapang tangokba noksa nung angur.

## Jalalabad TV station ka ISIL temi amakdang nisung 6 asü



**Jalalabad, May 17 (Agencies):** Afghanistan anüdoklen aliba Jalalabad yimti nung national television aser radio station kati prangpong bener temang nung bomb alenloker aita amakba mapang police tanishir ka densema nisung 6 asü.

Amaker temi AK-47 bener Radio Television Afghanistan (RTA) indang ki telungi Bodhbarnü ait, ta osang ajanga ashi.

"RTA amaker ya parnok nisung pezü liasü aser nisung kati iba ki telungi aitdak suicide bomb ka bokdaksü," ta provincial governor, Gulab Mangal-i ashi.

RTA building ya governor ki anasa lir aser iba ki anasa prangpong kanga sashia akha.

Tanüngba nisung asem ya mitkartemi kaset, ta Mangal-i ashi.

Islamic State of Iraq & Levant (ISIL, ISIS ta ajar) teloki iba lendong ya agütsü, ta sangdongogo aser US drone ajanga Afghanistan nung ISIL tanishir ka tepsetba sülen iba lendong atalok.

Iba lendong nung osangbener ka densema nisung 16 yiru, ta osang ajanga ashi.

"Asürtem rongnung RTA nung mapa inyaker driver ka, tanüker ka, technician ana aser police ana lir," ta Mangal-isa ashi.

ISIL telok ya Nangarhar province nung tesep tenteta lir aser iba tesem nung Jalalabad ya yimtiba lir aser parnoki Taliban aser Afghan sorkar den rarar.

Taoba ita US mitkartemi GBU-43/B Massive Ordinance Air Blast bomb, koba dang 'Mother Of All Bombs' ta ajar, iba bomb ya

Nangarhar nung ISIL telok alidak pokloktsü aser iba mapang ISIL nungi nisung ter dak tali asü.

Iba bomb bokloktsüba ajanga alima nung aliba kin aikati, bomb tendangtsü asoshi asoshi Afghanistan ya amshir, ta aitsür.

Bodhbarnü iba lendong ajanga Afghanistan nung aliba osangbenertem taküm lendong nung aliba tali jangja sayur aser tensa mejungi akümba angur.

Afghan Journalists' Safety Committee (AJSC) ajanga ashiba agi, 2016 küm ya osangbener tem asoshi küm tamajungtiba aser alima nung osangbenertem ashoshi lendong aliba linük nung Syria temaba aser Afghanistan ya tanabuba jenjang nung lir, ta ashi.

Taoba küm osangbener 13 tepset aser item rongnung parnok 10 bo Taliban ajanga tepset, ta AJSC-i ashir.

2016, January nung TV channel, Tolo nung mapa inyaker 7, Taliban indang suicide bomb ajanga Kabul nung bokset aser iba mapa ya osang tai belenshiba asoshi mangyangba mapa ka lir, ta Taliban teloki ashi.

2001 küm Taliban tashi samatsüba sülen Afghan nung osangbener dak amakba lendong rongnung ibai tuluba liasü.

US ajanga mitkar teyari agüjaka, Afghanistan nung yimten yimsüsüba tensa tamajungba akümer, ta US intelligence agencies nung tekolakba, Dan Coats-i taoba hopta metetdaksü.

US-i aniba mitkartemi Afghanistan nung küm 16 jungnüa rarayonga arudagi, aser iba ya America nunger asoshi rara talangtiba kümogo.



**Nagaland nung party...**  
(Tapak 1 nungi...)

Iba telok yagi nübortem ola aser taginüba angateta inyaktüsü aser 'regional' party tangateta nung national party mesüka inyaktüsü aser alima nung tziü mopong menenba tebilemstütem jembiba nung shilem agia inyaktüsü ta parnokisa metetdaksü.

Nübortemi temelenshi ka aginüa jembiba ataloktsüsü asoshi iba telok ya tentet, anungji nübortem atema shirnoki inyaker aser Naga yimten tebilemstü akoktsü atema shirnokisa shilem aginür, parnok ajak iba telok nung adentsü asoshi kishi lapoka lir ta parnokisa metetdaksü.

Tanü DPP mezüing lokti senden agiba sülen DPP tir Wb.Chingwang Konyaki anir mezüing mezüing Central Executive Board senden ka menogo.

Iba telok ya official-ibo Election Commision nungi temelaba ngur külenang tenzüksü ta parnokisa metetdaksü.

Iba telok nung tadong tirtemji Nuzota Swuro, Dr.Chumben Murry, K.Sukhalu, Sr.Sukhato aser Menuovilie shim aser tongti zülurtemji Rusemtong Longkumer, Benjamin Lorin aser Pausi Zeliang shim. Iba telok nung senyurji Dr.John Murry shimteta lir.



OFFICE OF THE  
**KOHIMA MOLUNGKIMONG SENSO UNION**  
KOHIMA: NAGALAND : PIN-797001

Ref. No. .... Date: 16-05-2017

**TENÜNGSANG TETUSHI AGÜTSÜR**

Mr. Meyionen Longkumer aser Mrs. Yashikala na jala **Miss. Purlemla Longkumer**, lai Sociologist Department nung **Rector's Gold Medal** aser iba den külemi **M.N. Karna Young Sociologist 2016** Masters Degree nung tetushi sempet tulu ngua sensosanger nem konang nungsang bener arutsü nung, Kohima Molungkimong Senso Union den külemi Kohima Tetsür Telongjem ajanga kanga pelaba metetdaksür.



Jala taküm aser la wadang nung Tsüngremi maneni moaja len aniang ta ozü Senso sanger sarasadem.

Sd/-  
**A.Toshi Walling,**  
President, KMSU.

Sd/-  
**Wapang Tzudi,**  
Gen. Secy., KMSU.

OFFICE OF THE  
**Dimapur Area Chuchuyimlang Senso Telongjem**  
DIMAPUR -797 112 : NAGALAND

Result of the Dimapur Area Chuchuyimlang Senso Telongjem Raffle Draw in aid of Building Construction.

- 1st Prize : 3827.
- 2nd Prize : 4956.
- 3rd Prize : 0801.

CONSOLATION PRIZES : 0164, 3990, 1292, 2146, 3457, 4105, 4218, 2034, 3851, 3089.

Winners should claim their prizes within 30 (thirty) days of draw with Original ticket.

**NUNGSANG JAMIR**  
Convenor

**FEDERAL GOVT. OF NAGALAND**  
**OFFICE OF THE MIDAN PEYU AO REGION**  
**OKING: KORIDANG, UNGMA**



66 buba Naga voluntary Plebiscite day 16-05-2017 Ao lima sub-Region balala nungi NNC/FGN National workers kanga longsoa adenshia Ungma yimtiba nung sarasadem tajung agia mongogo.

Iba anogo nung Shri. Imonenba Imsong Midan Peyu, Ao Region ajanga nübortem dangi tayongzükba ka agütsü. Naga nübortem tongtipangsa Ao kini angatetsübaji tanü India nunger tasa tamajung ajanga Naga National Workers ta telok tasen purapuja tentetba aser iba nung tekolak raktepba nübortem aibelendaksüba ya anendaksütsüla ta metetdaksü. Naga nungeri 1951 küm 16th May nung Naga nungerji peisasa yimsü süa alitsü ta koba 99.9%-i meyongnema ali (Plebiscite), iba tezüluba shity (documents) kong ali aser koba telok ket nung aka aji bushia arua iba nung longjemtsüla ta metetdaksü.

Iba den Aoli yimtsüing council ajak dangi osang ka metetdaksür. NNC/FGN-i Naga nunger nütsüing yongsük züngdang, anungji yimtsüing shia yimteni pei arogo dang asüngdangtepa 2017 censusji June ita tatem tashi nung Ao Region Midan Peyu Office tongtsüsü metetdaksür. Shir yimtsüing medongtsüdir tarutsü Naga nübör yongsük züngtepa nung medensemra pei pei yimtsüing khuret asütsü ta metetdaksür.

KUKNALIM

**Molungnen O**

ASO  
07-12-1926

ASÜ  
10-05-2017



**Ojala Yashisongla (Mongsenyimti)**

Arishi küm 91 lia arur, la shiranga aliba anogo nungi asüpila sentep aser chikozük tashi nung kija, Arogo aser telok shirnokisa rongsen, sarasadem aser nübu agi yariogo, nenok ajak dang kanga pelaba lemsateper.

Tsüngremi nenok ajak moajangma.

- *Chirnur, Kinunger, Anükapang aser Semchirtem.*

OFFICE OF THE  
**CHUNGZIA BAPTIST AROGO**  
B.P.O Chungtia, P.O Mokochung - 798601,  
Nagaland

"The grace of our Lord Jesus Christ be with you all, Amen."  
Rev.22:21

**TENÜNGSANG AGÜTSÜR**

Chungtia Arogoi lapokba Jubilee Memorial School, Chungtia nungi tanur ter (10) CL-X tatidang agütsüba parnok ajaki takok tajung nguteta, Arogo nem tenüing tajung bener arutsüba asoshi tesayurtem aser takok angurtem ajak nem Arogoi Tenüingsang agütsür.

**First Div.**

- 1. L. Imkongnaro Ajem
- 2. L. Bursashi Kichu
- 3. A. Jongshikokla Kichu
- 4. S. Imlimongla Kichu
- 5. I. Katilemba Kichu
- 6. L. Nungchetchila Longchar
- 7. I. Meyasenla Ajem

**Second Div.**

- 1. A. Imtikumla Longchar
- 2. A. Tetemjenba Longchar
- 3. K. Yimkummenla Kichu.

**Distinction**

- 1. Imkongnaro Ajem, ( English, Social Science, EVS ).
- 2. L. Bursashi Kichu, ( English, EVS ).

Chungtia lanurtem shirnoki tesem balala nungi takok jenjang balala nguteta HSLC aser HSSLC tatidang nung takok nguogo, nenok ajak nem Chungtia Baptist Arogoi tenüingsang agütsür. Tarutsü nung Tsüngremi nenok ajak pei azüngba wadang balala nung takok aser temoatsü nung aniang ta arogoi sarasademtsür.

Sd/-  
**Rev. M. Laka Tzudir**  
Pastor

Sd/-  
**Mr. I. Meren Longchar**  
Secretary

**HANDYMAN SERVICES**



**CALL NOW**  
We're available 24/7

**03862-280875**  
**09856243638**  
**09612664240**



**CARPENTRY:**

Doors, Windows, Tables, Wardrobe, Chairs, Benches, Furniture, Ceilings, Roofing, Racks, Shelves and any other repairs & renovations.

**ELECTRICAL & ELECTRONIC APPLIANCES:**

New electrifications & fittings, Electrical repairs, Interior & exterior lightings, Air Condition installation & repairs, Fridge repairs, Washing Machine repairs.

**PAINTING:**

Brush & roller paintings on new constructions, painting repairs, Mechanized paintings on furniture etc.

**PLUMBING & SANITARY:**

Bathroom & Toilet installations & repairs, complete sanitary fittings both internal & external, bore well fittings etc.



GB H. NO. 5 (1), B-BLOCK, DAROGAPATHAR, DIMAPUR

## India football team Nepal den friendly asayatsü

**May 17, 2017 (Agencies):** Visa dak sendakba tetsükdaktsü aliba ajanga Lebanon den friendly asayatsü aliba athiba sülen India team June 6 nü Mumbai nung Nepal den asayatsü.

India aser Lebanon nung Mumbai Andheri Sports Complex nung June 7 nü asayatsü liasü saka parnoki yashi All Indian Football Federation dang par linük nungi asayar bendanglen asayartem visa apply asütsü atema Beiut-i maratetsü ta metetdaktsü.

India sorkar temzüng nung Lebanon nungertem India-i

aruba sülenbo visa magütsütsü ta zünga lir.

Aji saka Nepal-i India den asayatsü asoshi molungogo. Iba asaya kasa tesem nung dang asayatsü saka anogo dang melenshir June 6 nü asayatsü.

AIFF-i All Nepal Football Association dang India den friendly asayatsü asoshi asüngdangba sülen parnoki molungogo, ta parnok official website nung agütsü.

"Nepal teburtem telok India national team den Mumbai nung June 6 nü asayatsü," ta parnoki metetdaktsü.

"Iba asaya ya telok

anaprongla atema tajangzük asütsü, kechiyong telok anaprongla AFC Asian Cup 2019 qualifier atema renemshiba asaya ka ama asütsü," ta kasa osang ajanga metetdaktsü.

AFC Asian Cup 2019 qualifier nung Nepal June 13 nü Yemen den Nepal nung asayatsü aser India nungera kasa anogo nung Kyrgyz Republic den Bengaluru nung asayatsü.

2015 küm December ita South Asian Football Federation (SAFF) Championship nung asayadang India-i 4-1 agi Nepal madak takok ngua liasü.

## Italian Open nung Fabio Fognini-i Andy Murray tsükdaktsü

**Rome, May 17 (Agencies):** Taoba küm Italian Open marok bena alisang aser World No. 1, Andy Murray ya Mongulbarnü Fabio Fognini-i 6-2, 6-4 agi tsükdaktsü.

Taoba mapang U.S Open akokla, Flavia Pennetta, shiba mezüng tanur asotsü mapang lir, la kinüngbu, Fabio-i Andy Murray madak mezüng takok angur alitsü.

Serbia nung Novak Djokovic-i jenjang 55buba nung

alisang Aljaz Bedene madak 7-6(2), 6-2 agi takok angu.

World No. 2, Novak Djokovic ya Madrid Open semi-final nung Rafael Nadal-i tsükdaktsü.

Kasa asayamong nung Marin Cilic-i America nung Ryan Harrison madak takok angu aser World No. 9, David Goffin-ia Spain nung Fernando Vardasco madak takok angu.

David Ferrer-ia Feliciano

Lopez madak takok angu aser iba asaya akokba ajanga pa indang career nung asaya 700buba akoker liasü.

Australia nung Nick Kyrgios bo yiruba ajanga iba asayamong nungi anentsüsa aküm.

Bodhbarnü asaya nung Nadal aser Spain nung Nicolas Almagro-na asayatsü aser World No. 3, Stan Wawrinka aser France nung Benoit Paire-na asayatsü.

## Osang prokba ya yimten tashi alir nem ...

(TAPAK 1 NUNGI...)

Kasa sentong nung Imphal Free Press nung yimozülur, Pradip Phanjoubam-i jembidang, osangtsüsang prokba mapa medeni democracy shitak mapa kuma meinyaktetsü ta metetdaktsü.

Osang renema agütsüba maparen indang jembidang, osangtsüsang abenba mapaji tatalokbatem ajak shitak jungjunga bendena tezüngnüsüka zülur agütsütsüla, ta pai-isa metetdaktsü

Osang zülü dang tazüngertem tenük puatsüsa osang indang tenüng (headlines) aser tetenzükba kanga junga zülutsüla aser osang abendang shiba, kong, kodang, kechiba aser komaser ta asüba mamai itemji bilemdanga aser asüngdangtepa zülutsüla ta paisa ashi.

Osangbener kaji pei mapa nung kibur kuma inyaktetsü asoshi kechi osang agütsüdir, iba maparen indangji jungjunga meteta alitsüla ta paisa ashi. Itemji election indang asütsüa akok mesüra war mesüra sports indang asütsüa akok, kechi mapa südir süaka osangbener kati iba mapa indangji meteta alitsüla, iba jiang tatalokba osang otsü kümer züludang tongtibang otsü mezüdoki zülutetsüla ta Phanjoubam-i metetdaktsü.

Paisa sen agütsür osang züludaktsüba indang aser osang abendang shinga tsütsüsa tejak meshii osang shitak abentsü nungdakba indang shisalemsatepa liasü.

Iba sentong nung shisalen teyur IPR nung Joinint Director, Dzüvinuo Theinuo government

aser nübertem na tesendaktep indang jembia liasü. Laisa osangbenertem taküm ochishia shitak aser tazüokba kübok alitsü nungdakba indang ashidang, osangbenertemji peisasa pei khuret metetba, ochi aser shitak litetba aser nübertem ajangzükdaktsütsü bilema inyakba nübo kaka asütsüla ta metetdaktsü.

Iba sentong tenzüka IPR Director, Wb.Limawati-i jembidang, Nagaland nung osangbenertem aika kumogo aser aibelenertemi osangbenertem tsübur, kechiyong parnoki osangbenertem dak aliba tashiji meteta lir ta metetdaktsü.

Iba sentong nung Kohima, Dimapur, Mokochung, Kiphiri, Mon, PRO defense aser IPR nungi osangbenertem dena liasü.



MAY 19, 2017 ASAYA

-----QUALIFIER 2-----

Mumbai VS TBC - 8:00 PM

MAY 17, 2017 ASAYA OSANG

Kolkata na Hyderabad na asaya tzunglu arua ajanga anenadok

## Tanü nungi 1buba Open Futsal tenzüker

**Kohima, May 17 (TYO):** Iba asayamong ya Naga Brihostibar nungi Local Ground, Football Club ajanga ayongzüker Kohima nung 1 buba Open aser Ground I o Ground-11 nung Futsal asayamong tenzüksü. asaya 10 tashi asayatsü.

Asayatemji yamai alitsü:

### Ground -1

1st match at 7.00 am -The Juggernauts FC vs Lerie FC  
2nd match - Young United vs Dahou United  
3rd match - Rising Brotherhood FcC vs Ziekezou  
4th match - All FC vs Pfuratsie FC  
5th match - Youngster FC vs Fast Five  
6th match - Unified SC vs Quasar Club  
7th match - Friends Collection Club vs Sperts FC  
8th Match - Team Awesome vs winner of 1st match  
9th match - Dream FC vs winner of 2nd match  
10th match - Dynamos Fc vs winner of 3rd match

### Ground -11

1st match at 7.00 am -Prege FC vs Turaco FC  
2nd match - Forest Colony FC vs Press Start FC  
3rd match - Achievers vs Trixie FC  
4th match - Blue Raiders vs Merhulietza FC  
5th match - Gari-ciko club vs NHCYO  
6th match - Hurricane Boys vs Rebels  
7th match - Zenith FC (Kohima) vs Royal Chedema  
8th Match - Onyx Club vs Asi FC  
9th match - Street Hawks vs winner of 1st match  
10th match - Young Heroes vs winner of 2nd match

## India U-17 teloki Saint Leu den kasa asaya

**Paris, May 17 (Agencies):** Bodbarnü Paris nung Indian U-17 football teloki FC Saint Leu den asayadang goal 1-1 nung tembang.

India asayartem ya taküm India nung asayatsü aliba U-17 World Cup nung asayatsü aser tang parnok Europe-i exposure trip atema oa lir.

Tanü parnoki Paris League nung second division club den asayabaji exposure trip nung shilem ka liasü.

Tanü India aser FC Saint Leu tsüngda asayadang half time

tashi nung telok katidang goal magütsütsüta liasü.

Asaya tenzüker minute 28 buba nung India asayar Shubham-i goal yoktsü merang saka Saint Leu goalkeeper-i ball nokdanga liasü.

Minute 58 buba nung France asayar rongnung Remi-i mezüngbuba goal agütsü. Ajsüsiaka, minute 72 buba nung India nungi Komal-i goal kaji küpdok.

Iba sülen telok anaprongi goal talila magütsütsüta asaya goal 1-1 nung tembang.

## ISL nung shilem agitsü asoshi East Bengal-i bid asayatsü

**Kolkata, May 17 (Agencies):** Indian Super League (ISL) nung shilem agitsü asoshi East Bengal-i bid asayatsü atema document meshiogo aser Mohun Bagan-ia kasa mapa inyaktütsü sidi.

"Bid asayatsü atema jaokba document tanü onoki Mumbai nungi meshiogo. Saka iba ajanga onok ISL nung shilem agitsü kuli tejangjabo magütsür. Kechi maongka sa aliar jungjunga meshisadang tashi tzüym nung tetsüng majemoktsü. Onoki shisadangba sülen tejangja metetdaktsütsü," ta East Bengal telok indang tongti zülur, Kalyan Majumdar-i ashi.

ISL nung shilem agitsü asoshi bid asayaba nung adentsü atema anu telemetba magi, iba atema tang jembishinüba mapang lir, ta Mohun Bagan indang tongti zülur, Anjan Mitra-i ashi.

Iba maparen asoshi ita asem tashi jembishinüba arutagi, ta osang

ka ajanga ashi.

"Invitation To Bid (ITB) nung kechi aliar parnoki meteta lir. Europe nungi international club anatia ITB atema tejangraba aliba sayuogo aser ISL office den jembishinüba mapang ka lir," ta Anjan Mitra-i ashi.

ISL ayonger, Football Sports Development Limitet ajanga May 12 nung ITB ajanga tender agütsü aser iba ITB ya May 25 tashi nung ISL ket tongtsütsü metetdaktsü. Taküm ISL nung team asem tali bendenloktsü lir.

Iba ajanga East Bengal aser Mohun Bagan-i ISL nung Bengaluru FC den külemi asayatsü asoshi lenmang lapoktsür ama lir. I-League melena ISL ya tuluba kümdaktsütsü mechi All Indian Football Federation ajanga Bengaluru FC nem ITB meshidaktsü.

Kolkata Giant-ia iba bid document ya meshitsü imlar.

**BILEMDANGANG**

"Nai koda azünger yamaji angazüker"